

MEP ta cumpli**Ley nobo pa castiga
iresponsabilidad y proteha
bida riba caminda**

ORANJESTAD (AAN): “Como lider, mi prioridad semper lo ta e seguridad y tranquilidad di nos famianan. Bida humano ta sagrado, y nos no por permiti mas dolor causa pa individuonan irresponsabel riba caminda,” lider di MEP, Evelyn Wever-Croes, a declara den Parlamento den cuadro di e aprobacion di e ley nobo di trafico.



Bo proteccion ta nos prioridad: Nos tur a biba e dolor di mira famianan destrui pa motibo di “hit and run” of coremento di auto irresponsabel sin tene cuenta cu otro. Evelyn a splica cu MEP a scucha e clamacion di pueblo y a actua cu firmesa.

E ley di iniciativa nobo aki, traha pa Edgard Vrolijk y Rocco Tjon, ta introduci castigonan hopi mas pisa pa esnan cu core auto den forma peligroso. “Nos ta manda un mensahe cla: den nos Aruba, nos ta cuida otro. Esun cu scohe pa core irresponsabel y pone bida di un mama, tata of yiu na peligro, lo enfrenta consecuencia serio di ley,” Evelyn a enfatisa.

Trabao serio cu ta duna fruta: Evelyn a resalta cu liderazgo berdadero ta wordo demostra cu echo, no cu palabra bashi. El a gradici e vision di su colega:

Edgard Vrolijk a declara cu esaki ta su di 9 ley di iniciativa. Vrolijk ya a logra leynan importante manera esun di Integrity di Minister y e Ombudsman. E ta un lider cu ta traha keto, cu hopi disciplina, semper pensando con pa haci nos pais mas fuerte y husto pa tur.

Rocco Tjon a splica cu su di 5 ley di iniciativa, e ta sigui fortifica nos seguridad y awor tambe ta enfocando riba salud preventivo, specialmente salud mental.

Union pa un futuro mas sigur: Evelyn a conclui recordandone pueblo cu MEP ta e partido cu ta trece tranquilidad y orden. “Mi ta orguyoso di lidera un fraccion cu ta traha cu curason y responsabilidad. Sea den Parlamento of den Gobierno, nos compromiso ta pa Aruba semper keda un pais sigur pa nos tur. Esaki ta e union y e seriedad cu nos pais merece.”

Caso serio Diamars atardi na San Nicolas**Nan a lubida un
muchacha den
vehiculo y el a haya
heat-stroke severo**

- *Mucha su curason casi no tabata bati mas*
- *Transporta cu Air Ambulance pa Colombia*

**Centro Famia Piedra Plat cu su proyecto
nobo ‘Pasadia pa Adulto Mayor’**

ORANJESTAD (AAN): For di luna di October 2025 a cuminsa cu un soft opening como un pilot program pa e Pasadia pa Adulto Mayor den famia. Den un estrecho cooperacion cu departamento di ouderenzaken Aruba, FCFPP a cuminsa cu e Proyecto aki.

Recientemente esta dia 12 di februari ultimo minister Mervin Wyatt Ras di asuntonan social y adulto mayor a haci e apertura oficial di e bunita Proyecto aki na FCFPP.

Awor ta asina leuw cu ta cuminsa cu 2 lokalidad pa ricibi e adultonan mayor, uno na Piedra Plat y e otro na Soledad y den e lunanan cu ta sigui, lo bay na habri di tres y di cuater Pasa dia pa Adulto mayor den famia conforme cu ricibi e apoyo di gobierno di Aruba via Ouderenzaken.



Un maneho sostenibel di destinacionnan turistico

Aruba Tourism Authority y Aruba Conservation Foundation a marca e comienso di nan aliansa strategico



ORANJESTAD (AAN): Recientemente Aruba Tourism Authority (A.T.A.) y Aruba Conservation Foundation (ACF) a tene e ‘kick-off meeting’ oficial cu ta forma parti di un aliansa strategico cu a ser firma na comienso di aña 2026. E meta di e aliansa strategico aki ta pa fortalece e compromiso di Aruba pa cu maneho di destinacion responsabel y sostenibilidad a largo plaso. Presente tabata Ronella Croes, CEO di A.T.A., Tyson Lopez, CEO di ACF, Rubiela Lampe-Chiquito, Managing Director di ACE Firm Engineering, hunto cu Reigene Geerman, Project Manager di ACE Firm Engineering, y demas representantenan di A.T.A. y ACF.

Esaki ta otro aliansa strategico importante cu ta forma parti esencial di maneho di turismo. E colaboracion aki ta alinia completamente cu e planan strategico di A.T.A., cu ta inclui un enfoke mas fuerte riba compromiso di stakeholder y aliansanan significativo cu organizacionnan no-gubernamental y institucionan educativo. A.T.A. tin aliansa clave cu CEDE Aruba, Cas di Cultura, EPI y EPB, Stimami Sterilisami, Comité Olimpico Arubano, Aruba Excellence Foundation y Aruba Hospitality & Security Foundation, entre otro. E asociacion cu ACF ta representa un otro paso importante den avance di e obhetivonan aki.

Pa algun aña caba Aruba Tourism Authority a adapta su prioridnan den mercadeo

turistico, cambiando mas y mas ainda di cantidad pa calidad. E direccion ta uno critico. Aunke semper e tabata parti di maneho di A.T.A. y tur concerni, teniendo cuenta cu ‘tur’ reto! Conhunto ta continua y progresa. Ta opta pa atrae e huesped cu un poder di compra mas halto pa nos isla. E grupo aki tambe tin expectativanan ora nan ta cu vakantie riba nos isla, pa cual a cera un aliansa strategico cu ACF, pa hunto garantisar un miho balans den kico ta ofrece e huesped, den cual ta tene cuenta cu tur aspecto, incluyendo naturalesa y medio ambiente.

Desde 2024: A start e colaboracion entre A.T.A. y ACF formalmente na aña 2024 cu firmamento di un Memorandum of Understanding (MoU). E acuerdo aki a pone un base solido pa un relacion productivo y impactante enfoca riba proteccion y preservacion di medio ambiente natural di Aruba, fomentando un relacion balansa entre naturalesa y turismo desaroyando experiencianan sostenibel pa e huespednan. Desde su inicio, e colaboracion a reenforza e balornan comparti rond di conservacion, educacion y desaroyo di turismo responsabel.

Cuminsando na aña 2025, e aliansa a drenta un fase nobo cu implementacion di e iniciativanan clave cu ACF ta prepara pa entrega alinia cu e vision di A.T.A. pa maneho di destinacion responsabel.

Atraves di e colaboracion aki, lo traha hunto riba e siguiente



puntonan di prioridad:

Inversion den infraestructura pa nos huespednan cu lo yuda guia nan den naturalesa di un manera cu ta proteha area sensibel y ta sostene acceso responsabel.

Colaboracion den conservacion cu ta inclui creacion di e prome Centro di Conservacion Marino di Aruba, cu lo wordo maneha door di ACF. E centro aki lo ta basa riba ciencia, enfoca riba educacion y restauracion di biodiversidad marino y salud sostenibel di ecosistema na largo plaso. Esfuerzo conhunto pa aumenta conscientisacion publico por medio di campananan autentico y impactante. Esaki ta esencial pa proteccion na largo plaso y conducta responsabel den naturalesa y mas aya.

Anuncianan riba borch: Mehora e borchinan / señal di caminda y informacion! E aliansa strategico lo ta di aña 2025 te cu 2028, marcando un colaboracion di tres aña diseña pa logra un impacto duradero.

“Temponan a cambia, mundo a desaroya y loke un turista tabata gusta 20 aña pasa, awe ta diferente. Mas y mas turista ta opta pa sostenibilidad, ta aprecia naturalesa mas y ta sostene durabilidad. Semper Aruba a fungi como un ehempel turistico den Caribe. Y den esaki tambe nos kier ta un ehempel, pa por conserva tur e bunitesa di nos isla tambe pa e generacionnan cu ta sigui”, asina Ronella Croes, CEO di A.T.A. a indica na e reunion special aki. “Esaki no ta djis un acuerdo pa un relacion di tabou conhunto. Esaki ta un comienso nobo di un modelo nobo, adapta na e tempo actual, mara na deseonan di awendia y pa garantisar cu nos tesorosonan natural lo t’ey pa hopi generacion mas”.

“Pa ACF, e acuerdo aki ta un reafirmacion di nos respons-



abilidad pa proteha y restaura e biodiversidad y ecosistemanan natural di Aruba”, ta comenta Tyson Lopez, CEO di ACF. “Naturalesa no ta un recurso pa uza, sino un sistema bibo cu ta sostene bida, nos bienestar y e futuro. ACF ta comprometi pa maneha acceso na naturalesa di un manera responsabel y sostenibel, cu respet pa su balor, su fragilidad y su capacidad di recuperacion. Tur decision cu nos ta tuma awe mester contribui na ecosistemanan mas saludabel, biodiversidad mas fuerte y un isla cu por sigui sostene tanto su comunidad como su bishitantenan pa hopi aña cu

ta bin.”

Compromiso: Nan ta fortificando e compromiso di sostenibilidad di Aruba. E aliansa entre A.T.A. y ACF ta un colaboracion valioso cu ta combina e vision di maneho di destinacion di A.T.A. cu e experticio di ACF den conservacion di medio ambiente. Hunto, ambos organizacion tin como meta pa balansa crecimiento di turismo cu proteccion di medio ambiente, engrandece experiencianan di huesped pa medio di infraestructura y educacion y posiciona Aruba mas aleu como un lider den turismo sostenibel den region.

Caso serio Diamars atardi na San Nicolas

Nan a lubida un mucha cera den vehiculo y el a haya heat-stroke severo

- *Mucha su curason casi no tabata bati mas*
- *Transporta cu Air Ambulance pa Colombia*



ORANJESTAD (AAN): Riba Diamars, e temperatura na Aruba den dia a yega tur skina di e isla na 31° Celsius, y solo tabata kima sin misericordia. Den oranan di mainta so tabatin tiki yobida leve den area di Noord.

Sinembargo pariba di Brug, esaki tabata seco y cu masha poco nubia mes pasando riba Aruba. Ora cu temperatura ta 31° Celsius... cu solo fuerte e ora den e parti interior di un Auto of un Van, temperatura por yega dentro di un ora na entre 50° Celsius te cu 60° Celsius. Pues casi 140° Fahrenheit, cu ta pone sinti paden casi mescos cu un forno. E interior di un vehiculo por ta semper 30 te cu 40° Celsius mas hopi compara cu e temperatura di pafo.

A lubida mucha den vehiculo: Den tur e calor ey di Diamars, ningun hende por a imagina cu un mucha chikito di como 5 aña di edad a keda den un vehiculo cera... te cu e criatura a bay den un 'heat-stroke' severo.

E mucha di 5 aña ta bay scol

preparatorio, y na final e tin di djis warda pafo pa un Van di un Crèche ta pasa buske. E Van aki ta e transport'e tur merdia for di Scol pa e Crèche.

Pero riba Diamars merdia, ora di yega na e Crèche y a staciona e Van, aparentemente e Driver cu ta traha na e Crèche a lubida cu e mucha ta sinta patras. El a staciona e Van, cera tur bentana y lock e portanan, y a bay paden.

Asina e pover mucha a keda den e Van, unda e temperatura den 60 minuut lo a yega entre 50° pa 60° Celsius. Dashboard di vehiculo por hasta yega 85° Celsius y por laga quemadura na bo braza of man si bo mishi cu ne. Tin di corda cu e curpa di un mucha ta bira cayente 3x te 5x biaha mas rapido compara cu adultonan.

Heat-Stroke serio: Si acaso un ser humano keda mas di un ora den calor asina, sin liquido pa bebe, y temperatura ta 45° Celsius of mas... ya caba su bida ta den peligro severo, y chens grandi pa mortalidad ta subi rapidamente. Pesey no tin ningun situacio safe pa laga muchanan pa nan cuenta den un auto, hasta pa un rato so. Pa colmo vehiculonan cu ta di color preto of scur pafo, ta bira cayente mas rapido parti paden. Curpa di e mucha ta cuminsa produci hopi sudor, pero debi na e calor inmenso dado momento e ta

stop, y e cuero ta cuminsa bira seco y hopi cayente. Aki ta bin cu situacion neurologico, unda e mucha ta bira confuso, desorienta, comportamiento ta bira irracional, y por cuminsa bay fo'i tino. E calor inmenso aki ta duna e mucha dolor di cabez severo, e por induci sacamento, mareamento, y halamento di rosea ta aumenta, cu respironan chikito.

Organonan den curpa ta cuminsa dañá rapidamente door di e calor extremo aki, incluyendo e curazon, higra, y riñon.

E tata a yega crèche: Te atardi manera costumber, despues di e trabao na caminda pa cas, e tata ta yega na e Crèche pa asina busca su yiu. Na e Crèche ora cu nan a mira e tata yega, nan a haya raro pasobra henter merdia pa atardi nan no a mira e mucha paden. Aki ta unda cu a busca rond pero no haya e mucha, y ta ora cu a core bay wak den e Van cera, a bin haya e criatura inocente fo'i tino. Esey ta indica cu e sistema nervioso central di e mucha a cuminsa desfunciona, e organonan a cuminsa faya, su cerebro lo por a hincha, y por ponebo bay den coma.

Un persona no a perde pa gana, y a core hiba e criatura pa Servicio di Emergencia na ImSan na San Nicolas cu ta hopi cerca. Na yegada a core pidi pa auxilio, y mesora nan a lage bay paden pa asistencia.



E temperatura di e mucha tabata basta halto, y a cuminsa spuit e curpa cu awa, y a pone un ECG Machine pa check su curason.

Tin indicacion cu e curason tabata bati irracional y no corecto, y aki ta unda cu casi tur docter na ImSan a cuminsa duna tratamento na e criatura aki. Nan a haci uzo cada uno di nan conocimiento, y di tratamento cu nan ta memorisa pa situacion asina.

Nan a traha basta rato cu ne pa asina trata di estabiliza e curason, cu tabata un proceso basta largo. Dado momento a realiza cu e tin di wordo hiba pa tratamiento mas avanza na Hospital, y asina a pidi pa presencia di Ambulance pa haci e transporte. Pero Diamars atardi tabata uno hopi druk pa emergencia medico rond di e isla, y tur Ambulance tabata riba caya ta atende situacionnan.

Polis a habri caminda: Mientras tanto a haya un Ambulance cu a yega ImSan, y cu patruya di Polis su dilanti a habri caminda pa bay pabao cu ne. Polisnan di Santa Cruz, y unidadnan motoriza

a yuda cera varios rotonde pa asina Ambulance por pasa sin problema. Atardinan despues di 5:00 pm semper ta hopi druk na Aruba y cayanan ta congestionan. Pues e yudansa aki di Polisnan di San Nicolas, Santa Cruz, y Oranjestad a yuda bastante.

Transporta pa Colombia: Te cu Diaranson atardi, a haya indicacion cu e mucha tabata den situacion critico internamente den Intensive Care Unit na Dr. Horacio Oduber Hospital. Sinembargo specialistanan a bisa cu e tin di acudi na unidatnan specializa pa situacionnan asina, pues a dicidi cu e tin di bay cu urgencia pa Hospital na Bogota, Colombia. Cu Air Ambulance riba Diaranson atardi el a wordo transporta pa Bogota.

Indicacion ta muestra cu Recherche di San Nicolas ta investigando e caso aki, y kizas Ministerio Publico tin di tuma un decision si acaso e driver di e Crèche tin di bay responde penalmente pa e sucedido of no. Ta haciendo peticion pa comunidad di Aruba haci oracion pa salud di e mucha.

Entrada hudicial

Unit Narcotica a detene 3 sospechoso y a confisca 167 kilo marihuana y 1 arma di candela

ORANJESTAD (AAN): Cuerpo Policial a informa cu en conexion cu un caso na unda aña pasa un total di 167 kilo di marihuana a wordo intercepta via carga pa Aruba tres persona a wordo deteni. Unit Narcotica no a para keto y a sigui investiga, compila informacion importante pa combati criminalidad cu a conduci na detencion di 3 persona. Ta trata di e homber-

nan di inicial J.G.A.A nacionalidad Venezolano di 30 aña y C.A.R.A nacionalidad Venezolano di 35 aña tambe e hende muher di inicial Y.V.C.R naci na Aruba di 43 aña di edad.

A haci un entrada hudicial na un parcela na Cayenastraat y na Bakval. Durante e entrada hudicial Unit Narcotica a canta bingo y a haya un arma di candela y esaki a wordo con-

fisca pa mas investigacion.

Pa cu entrada hudicial a haci uzo di Teamnan special pa ehecuta un tremendo accion bon coordina ta trata di Team di aresto, Unidad di k-9 di polis, BFTO y polis uniforma. No ta descarta cu lo tin mas detencion. Cuerpo Policial ta haci un apelacion cu si bo sa algo of bo a mira algo yama e tiplijn di polis cu ta 11141. Bo ta keda anonimo.



Mañan ta haya sa e sentencia

Hues ta dicidi riba castigo di prison, multa y detencion di estafador di Stichting Sportsubsidie Aruba

ORANJESTAD (AAN): Mañan mainta Hues di Corte den Promer Instancia lo dicidi riba e 2 aña y 6 luna di prison cu Fiscal a exigí, e demanda di 7.720,63 Florin y detencion inmediato di e homber Kenneth Vrolijk.

Sospechoso a bay for di Aruba: Dia 6 di Februari 2026, Hues di Corte den Promer Instancia a trata e caso penal cu Ministerio Publico a

cuminsa contra Vrolijk di 30 aña. E caso ta hiba e nomber “Bromelia Zaak”. Ta asina cu Vrolijk no ta na Aruba y no a presenta den Corte.

Su abogado mr. Carlo a presenta. Tin indicacion cu e acusado ta scondi den exterior. E ta wordo acusa di estafa di Stichting Sportsubsidie Aruba (SSA), malversacion di fondonan publico, labamento di placa y mal uso

di su funcion como empleado di Gobierno.

Malversa mas di 180 mil Florin: Den e periodo entre Mei 2023 y September 2024, Vrolijk a malversa mas di 180 Mil Florin di Gobierno. E placa aki a wordo entre otro pasa via cuentanan bancario di cuatro otro persona (asina yama “mulanan di placa”), pa asina yega riba cuenta di Vrolijk.



Riba Diamars atardi

Barco crusero a drenta vap-vap pa trece pasahero malo na Aruba



ORANJESTAD (AAN): Riba Diamars atardi un yamada di urgencia a drenta na Capitanía di Aruba, for di e barco crusero Serenade of the Seas, cu e momento ey ta varios miya pabao di Aruba. E barco aki ta actualmente riba un itinerario di ‘Southern Caribbean’, cu a sali Diasabra 21 di Februari for di Colon (Panama) y ta regresa eynan riba Diasabra 28 di Februari. Esaki ta un di e viahenan cu ta uzando un homeport pafu di Merca, como cu hopi hende di exterior no kier viaha mas pa Merca pa subi crusero na Florida, mirando cu Inmigracion di ICE ta capturando hopi turista inocentemente.

E barco a bishita Diadomingo e ciudad di Cartagena (Colombia), y riba schedule ta poni cu Dialuna y Diamars ta bay ta riba lama, y Diaranson lo ta bishitando

Bonaire. Riba su schedule e lo ta awe Diahuebs na waf di Oranjestad na Aruba.

Emergencia abordo: Tin indicacion cu tabatin pashent cu a bira malo, y e situacion di e persona ta hopi mas grave cu loke e Docter abordo por atende, pues tin mester di tratamiento mas specializa.

E momento ey nan ta riba lama ta moviendo pa Bonaire. A consulta cu Capitan, y e Docter a splica cu nan no por warda te Diaranson pa yega Bonaire, como cu e caso ta urgente. A mira cu e port mas cercano ta Aruba, y asina a dicidi cu ta bay djis stop un rato na Aruba pa baha e pashent.

Banda di 6:00 pm e barco a cuminsa acerca Oranjestad, y pa exactamente 6:20 pm, e barco a mara na berth B di Waf di Playa. E momento ey tabatin dos otro cruiseship

den Waf di Aruba ainda, esta Norwegian Sky cu ta mara na berth C, y tambe Oasis of the Seas cu tabata mara na berth I. Pa casualidad, eynan na berth B como un ora prome, esta 5:00 pm e crusero Oceania Insignia a caba di bando na Aruba.

E cabuyanan a los y pa 7:05 pm e barco a hala bek for di Waf, y a sigui riba su rumbo pa isla di Bonaire. El a mara Diaranson mainta pa 7:55 am na e Pier na isla di Bonaire.

Na Aruba mientras tanto e pashent a keda abao na tera y interna na Dr. Horacio Oduber Hospital. E agencia di Royal Caribbean International a keda encarga pa tur e logistica di e pashent.

Awe e barco lo tey na Waf di Aruba atrobe. Serenade of the Seas tin capacidad maximo di carga 2.578 pasahero.

Den practica e forma di traha aki ta nifica cu Vrolijk tabata paga e subsidionan na su mes, envez di a eheda e proyecto pa engrandece deporte na Aruba.

Falsifica firma di Minister: A sali na cla cu Vrolijk tabata falsifica e firma di e minister di Enseñanza y Deporte diferente biaha. E “mulanan di placa” y otro personanan involvi den e caso aki, lo wordo persigui tambe. Esey lo bira un asina yama TOM-zitting (Transactie Openbaar Ministerie), caminda Fiscal lo atende cu nan.

Durante tratamento di e caso, Fiscal a bisa cu ta tuma Vrolijk hopi na malo pa loke el a haci. El a perhudica comunidad di Aruba, door di uza e placa di pais Aruba, pa e biba un bida estilo di luho. E placa cu tabata destina pa engrandece deporte na Aruba, Vrolijk a maluzar esaki pa su propio uso. E mal hecho aki

a causa daño na integridad di Gobierno, di SSA) y otro fundacionnan di Gobierno.

Exigencia di Fiscal: Durante tratamento di e caso a sali na cla cu Vrolijk a paga bek SSA gran parti di e placa cu el a malversa. Fiscal ta haya cu mester duna castigo di multa di 7.720,63 Florin, cual ta e suma cu ainda Vrolijk falta di paga.

Ademas di esaki, Fiscal a exigí un castigo di 2 aña y 6 luna di prison pa Vrolijk y tambe cu pa un periodo di 7 aña, Vrolijk ta perde su derecho pa traha como empleado di Gobierno.

Fiscal a exigí detencion inmediato di Vrolijk pasobra ta existi e riesgo cu Vrolijk lo trata di sconde pa cumpli cu e castigo.

Ta asina cu Hues a suspende e caso y mañan lo por spera cu Hues ta sera tratamiento di e caso y dicta sentencia di biaha.

MAESTRO BENJAMIN

MAESTRO BENJAMIN, UN MAESTRO CU DI BERDAD TA PARA SUFRIMENTO.

Bishit'e abo mes! Maestro Benjamin ta sigui y caba cu e trabao cu otro a cuminsa na otro lugar.

- E ta kita bruheria, hechizos, daños y tambe e ta dera maldicion y salamientos.

- E ta cura y sana tur tipo di enfermedad manera artrosis, alzheimer, demencia, depression, diabetico, hipotiroidismo, osteoporosis, parkinson, insomnia y hopi malesa mas.

Abo mi amigo stima, cu ta sufriendo di bo prostaat of impotencia sexual, Maestro Benjamin tin e tratamiento pabo cu lo curabo den un tempo cortico.

“Mi ta cura problema di addiction di droga y alcohol y mi ta recupera bo ser kerí sin importa tempo of e distancia.”


No sufrí mas den silencio pa tur problema tin un solucion y pa tur enfermedad tin un sanacion. Trabao ta 100% garantisa y den un poco tempo.

Yama awe mes of manda un WhatsApp na 641-4186 pa traha bo afspraak.

CEL/ 641-4186

Cu su historia, significado y orguyo nacional

Aruba ta celebrando e 50 año di su bandera



ORANJESTAD (AAN): Aruba ta marcando un aniversario special na 2026: 50 año di su bandera oficial, introduci 18 di maart 1976 hunto cu su himno nacional "Aruba Dushi Tera." E fecha, cu actualmente ta celebra cada año como Dia di Himno y Bandera, ta un oportunidad pa reflexiona riba e identidad nacional, unidad y nos trayectoria como pueblo.

Pa logra un simbolo cu ta refleha e identidad unico di Aruba, un concurso di diseño pa un bandera a tuma luga na 1976, caminda a ricibi 693 dibuho for di comunidad. Ya cu tabata difcil pa scoge un diseño, a dicidi pa busca ayudo di Flag Research Institute of Massachusetts pa medio

di Sarah Bollinger. For di varios diseño, cu tabata tin cierto semehansa manera e strea y e strepinan, a keda presenta un diseño. Un diseño cu a laga un impresion enorme y cu significado politico y cultural, a keda acepta y asina e bandera di Aruba a nace.

Den un periodo caminda Aruba tabata pone e base pa autonomia politico y cultural, e bandera a bira un simbolo fundamental di nos identidad distinto for di e bandera colonial anterior.

E caracteristicanan di nos bandera: Bandera rectangular cu proporcion 2:3. Den e tercio abou tin tres banchi horizontal geel-blauw-geel, cada un cu hanchura igual na 1/18 di e bandera. Den e parti ariba na banda robes tin un strea cora regular di cuatro punta cu rand blanco.

Dia 16 di maart 1976, Gobierno di Teritorio Insular di Aruba a aproba oficialmente nos himno y nos bandera. Dos dia despues, riba 18 di maart 1976, e bandera a ser hisa pa prome biaha den Wilhelmina Stadion (awor Stadion Guillermo Prospero Trinidad), hunto cu e interpretacion oficial di "Aruba Dushi Tera".

Desde cu Aruba a haya su Status Aparte riba 1 di januari 1986, e bandera a bira oficialmente e Bandera di Pais Aruba dentro di Reino Hulandes.

Significado di e color y e simbolonan: Dia 17 di october 2014, e Decreto Nacional di Bandera, Escudo y Himno a ser actualisa (AB 2014 no. 51), pa stipula oficialmente e colornan di Nos Bandera segun sistema Pantone, garantizando consistencia y respet pa nos simbolo nacional.

E bandera di Aruba ta compone di: (*) Color Blauw (PMS 279 C). Ta representa e lama y e shelo cu ta rondona nos isla, simbolo di paz, libertad y speranza.

(*) Dos liña horizontal geel (PMS 109 C). Nan ta simbolisa abundancia y prosperidad,



incluyendo nos historia economico di oro, aloe y petroleo, mescos cu nos industria y turismo actual.

(*) Strea cora (PMS 032 C) cu rand blanco (Blanco Absoluto). E cuatro puntanan ta representa e direccionnan di e compas y e diversidad di nos pueblo. E cora ta expresa e amor profundo pa Aruba y memoria historico (incluyendo Rooi Frances y e uzo historico di color cora na industria local).

E rand blanco ta simbolisa nos beachnan blanco y e pureza di curason di nos pueblo cu ta respeta husticia, orden y libertad.

Significado nacional y legado: E bandera no ta solamente un simbolo grafico; e ta un representacion di nos identidad, historia y futuro. E ta expresa e caminda cu Aruba a tuma pa bira un comunidad autonomo, uni y orguyoso di su cultura y su pueblo.

Cada 18 di maart, Aruba ta celebra su Dia di Himno y Bandera, cu ta combina festividad cultural, acto protocolario, manifestacion y desfile, pero mas aun ta fortifica e sentido di orguyo di ta Arubiano y hunto ta honra e simbolonan nacional y su historia.

E año aki, 2026, e celebracion di 50 año di nos bandera ta bira un aniversario special cu lo fortifica orguyo, rebiba nos historia y un mirada pa futuro, reconociendo e rol di e bandera como un simbolo duradero di union y identidad pa tur Arubiano.




"Giselle"
Department Store

NOORD 55 A • Tel: 5867104 Ladies & Children Wear • Lingerie • Toys • Household Articles

18 Maart

Dia di Himno y Bandera TA SERCA



Giselle tin t-shirt cu 3 diferente diseño y di mucha y hende grandi.

Tin hopi paña sportief pa sali keiro e dia ey.

Bin wak nos blusanan cu nos a haya y tin bunita slacks pa fit cu nan.

PA PASCO GRANDI NOS TIN:

Varios sorto di webo di plastic den varios tamaño.

Macuto pa piki webo, tent, bunny ears, saco pa hinca mangel y varios articulo mas.

PA MUCHANAN BAI LAMA TIN:

Badpak, beachshort, rashguard pa contra solo, goggles, zwemvest, coi hunga riba beach, duikbril, varios style pool y serbete pa lama.

PA PRIMERA COMMUNION:

Tin bistirnan di size 8 te cu 16, wal, corona, hanschoen.

SET DI BACHI:

Di size 6 te cu 18 den diferente color e.o.: blanco, preto, khaki, royal, blauw, scur, shinishi, ivory y mas color y den bon prijs.

PA HACI REGALO PA MUCHA NOS TIN VARIOS SPEL:

Mens erger je niet, ganzenbord, rummykub, towergame, domino, bingo, mastermind, cabuya pa bula, hoelahoep, jacks, set make-up y hopi mas.

*Nos ta warda bo na Giselle pa duna bo
e mesun bon servicio di semper.*

ONDERCURATELESTELLING

Bij beschikking van het Gerecht in Eerste Aanleg van Aruba d.d. 23 februari 2026 is de ondercuratelestelling van:

Ellen Bridget ROOS, geboren op 19 april 1943, uitgesproken met als curator benoemd Edward DE VEER, geboren op 28 september 1942.

De advocaat, mr. A.I.N. Fraser.

Aruba Conservation Foundation mustrando riba e importancia pa tin area natural protehi

ORANJESTAD (AAN): Blue Marine Foundation ta un fundacion di Reino Uni cu a wordo estableci na aña 2010 y ta dedica specialmente na proteccion di lama, restauracion di ecosistema marino, y promocion di pesca sostenibel pa garantisar lama sano pa futuro generacionnan.

E fundacion ta asisti otro organizacionnan na mundo pa cumpli cu e metanan pa conservacion marino. Nan ta traha na 29 pais y tsolamente ta traha riba

invitacion di e pais. Aruba Conservation Foundation (ACF) tin cinco aña caba trahando cu nan. Y recientemente, ACF hunto cu Blue Marine Foundation ta asistiendo Directie Natuur en Milieu (DNM) pa yega na e meta di 2030. E meta aki ta un acuerdo entre tur e paisnan cu ta cay bou di Convencion di Diversidad Biologico.

Señora Sietske van der Wal di ACF, den un entrevista cu DIARIO a duna di conoce cu pa garantisar



cu bio-diversidad tin su espacio di biba y sobrevivir, ta importante pa tin por lo menos 30 por ciento di mundo, den awa y riba tera. Den e convencion a

dicici cu pa prome cu aña 2030, cada pais mester asigna 30 por ciento di tera, y 30 por ciento di lama, por lo menos, como areanan natural protehi.

Señora van der Wal a duna di conoce cu actualmente Aruba tin riba tera casi 25 por ciento protehi y falta menos cu 6 por ciento ainda pa cubri. DNM hunto cu Departamento di Infraestructura lo tin pa bay asigna e areanan aki cu falta.

Sinembargo, den lama

si falta casi e 30 por ciento completo ainda. Te ainda tin 0.2 por ciento so di nos lama protehi. Esaki ta e motibo tambe, señora van der Wal a bisa, cu a cuminsa cu e proceso pa asigna e 30 por ciento aki den lama di Aruba. E ta un proceso bou encargo di DNM pero Blue Marine Foundation, cu tur nan experiencianan mundial, ta asisti den esaki, hunto cu ACF, cu actualmente ta manehando di tur e areanan protehi na Aruba.

Chauffeur basta burachi laga basta destruccion na Playa



ORANJESTAD (AAN): Tabata Diamars anochi, cu Central di Polis a core dirigi un patrulla di Playa rumbo pa final di Wilhelminastraat y comienzo di Havenstraat, net na e rotonde banda di Misa Protestant como cu hendenan a mira un auto compacto dal contra e tubonan cu tin riba paceranan.

E prome patrulla di Polis cu a yega, a bin topa cu basta daño, ocasiona door di e chauffeur di un auto compacto Suzuki Swift color blanco cu number A-83437,

cu a baha di caminda y bay dal riba e tubonan cu ta proteha e 'isla' cu tin net pazuid di establecimiento di Zara.

Patrullanan di Polis a haya necesario pa cera e pida aki di Havenstraat, como cu e daño cu e Suzuki Swift a ocasiona ta extenso, fuera tin tambe pieza di e auto riba caminda, y ta blokeando e paso.

Testigonan a splica cu na prome instante, e chauffeur a trata di huy for di e lugar cu e auto, pero e daño extenso y wantalodo dobla a pega na e wiel, y no ta lage move facil

mas.

Polis a papia cu e chauffeur, y inmediatamente a ripara cu e persona aki tin caracteristica di ta bao influencia di alcohol. Esey a mira ora pone flashlight den su cara y wowonan ta basta cora, fuera ta papia cu lenga pisa, y di baina e por para drechi riba su pianan.

El a wordo aresta y hiba pa Warda di Polis, unda el a ser presenta dilanti un Fiscal Auxiliar. Takelwagen a yega pa bay cu e auto.

TA SOLICITA PA TRABOU

Part-Time Cashier

Aplica Personalmente Na
Seroe Blanco
Service Station
DeLasallestraat 89

SEROE BLANCO
service station

Tambe preparando pa un ROPV nobo

Ministerio di Infraestructura a start proceso pa extension di ROPV actual

ORANJESTAD (AAN): Ministerio di Infraestructura a anuncia e inicio di preparacion di un decreto nobo pa extension di ROPV actual y simultaneamente, preparacion di un ROPV revisa y nobo. E paso nan aki ta parti di e Plan di Infraestructura Nacional, manera menciona den e plan di gobernacion di AVP-Futuro y ta bin for di e necesidad pa maneha e transicion entre e ROPV actual y un ROPV nobo.

Segun anuncio, e decreto di extension lo prolonga e validez di e ROPV actual

pa e periodo necesario pa prepara un version nobo riba un base realistico. Minister Herde a indica cu e proceso di renobacion lo tuma un tiki tempo y cu den e proceso lo involucra departamentonan y instancianan gubernamental, priva, organizacion no-gubernamental y partnernan importante di sector priva.

E decreto lo indica formalmente cu un ROPV revisa y nobo ta den preparacion. E decreto aki lo por contene condicionnan y reglanan na cual mester atene na nan te ora cu e ROPV nobo



ta cla pa implementacion. Tambe a wordo indica cu e preparacion di e decreto lo tin un duracion fiho pa un periodo concreto, cu ta sirbi pa duna siguransa cu un ROPV revisa y nobo lo



bin despues di e proceso di preparacion y consulta.

Ministerio di Infraestructura a subraya cu e proceso aki ta importante pa duna claridad riba e trayectoria

di trabao y pa tene tur instancia y partnernan involucra na altura di e desaroynan na caminda riba tereno di maneho di espacio y ordenansa na Aruba.

Tres ocupante di auto deteni riba caminda na Piedra Plat

ORANJESTAD (AAN): Diamars anochi pa mas o menos 9:00 pm, un patruya atento di Polis a stop un auto sedan Mitsubishi Lancer color blanco, riba e caminda net pabao di Bright Bakery na Piedra Plat. Den un frega di wowo, mas oficial di Polis a yega eynan pa refuerzo.

Den e auto cu tinted windows, tabatin 3 ocupante. Polis a obliga nan tur pa baha, y a cumenza rista nan.

Tur esaki a socede, debi cu informacion a circula cu mas trempan den dia, e esnan den e auto aki a menaza hende cu morto den area di Paradera. Pesey henter dia, Polisnan tabata sigui rond pa check si por



topa cu e auto. Ta te Diamars anochi autoridad ta localisa e auto aki y stop'e.

Durante cu tabata controla den e auto, a bin topa cu un arma di candela, y esaki lo tabata den e paña color scur y polis a pone esaki den pa-

truya. A solicita pa Vehiculo di Transporte pa bin busca e detenidonan, y tambe a pidi yudansa di team forensico di BFTO pa check e arma y demas potoshi cu tin den e bahul di e auto. No ta conoci kico exacto a topa cu ne den e ba-



hul.

Departamento di BFTO a analisa e arma, y a resulta cu e agentenan na e sitio no a pone tino cu e arma di candela ta-

bata falso.

Awor Recherche ta investigando e caso, relaciona cu e caso di serio di menaza cu morto.

YOUR SAFETY IS OUR CONCERN...

Office: 582-3026

Address: Wayaca Fall 199, Unit # 8

Email: stuartsecurity@hotmail.com

... FOR ALL YOUR SECURITY ISSUES

www.stuartsecurity.com



STUART SECURITY SERVICE



AANKONDIGING

Bij exploit van mij, Josefin P. Locadia, deurwaarder voor burgerlijke zaken bij het Gemeenschappelijk Hof van Justitie van Aruba, Curaçao, Sint-Maarten, Bonaire, Sint Eustatius en Saba, en bij het Gerecht in Eerste Aanleg van Aruba, van **20 februari 2026** waarvan een afschrift is gelaten aan de Directeur van het DWJZ in Aruba, die het origineel hiervan voor GEZIEN heeft getekend, is **de erfgenamen van Maart THIEL**, zonder bekende woon- of verblijfplaats in Aruba of elders, **OPGEROEPEN** om op **woensdag, 27 mei 2026 des voormiddag om 08.30 uur** ter terechtzitting van het Gerecht in Eerste Aanleg van Aruba, gevestigd aan de J.G. Emanstraat nr. 51 Aruba te verschijnen, teneinde op het door **Julieta Lucia DE PALM**, domicilie kiezende te Wayaca 6-B in Aruba ten kantore van advocaat **mr. Susette Paesch** ingediend verzoek te worden gehoord.

Josefin P. Locadia,
Gerechtsdeurwaarder.
588-1700

Sindicatonan ta haya cu e re-inicio di Dialogo Social ta importante pa Aruba



ORANJESTAD (AAN): E siman aki, e re-inicio di Dialogo Social a ser ricibi cu un tono constructivo door di diferente sindicato cu a participa den e reunion recientemente cu Gobierno. Representantenan sindical a enfatisa importancia di mantene un plataforma estructura di intercambio riba tema social y economico relevante pa pais.

Mas di 21 gremio a participa den Dialogo Social cu a cuminsa 22 di februari.

Presidente di FTA, Hose Figaroa, a indica cu dialogo social semper ta un instrumento esencial ora

decisionnan importante mester wordo tuma. Segun Figaroa, e espacio pa scucha y intercambia punto di bista entre Gobierno, sector sindical y otro actor den comunidad ta fortalece proceso di gobernacion.

“Dialogo social ta algo positivo. E hecho cu tin oportunidad pa scucha opinion di diferente sector den pais ta un paso importante,” Figaroa a declara.

Rodney Solognier, representante di Sindicato SPA, a mustra optimismo cu e plataforma a reanuda. El a enfatisa cu sindicato ta mira positivamente e apertura pa trata tema man-



era salario minimo, Ley di Pensioen General y otro asunto cu tin impacto directo riba trahado.

“E dialogo ta un bon comienso. Lo mas importante ta cu tin espacio pa nos punto di bista wordo presenta y considera,” Solognier a indica.

Di su banda, Jayburtt Dijkhoff, PhD, consehero di sindicato TOPA, a resalta cu e reactivacion di dialogo social despues di periodo di interrupcion ta un señal positivo di comunicacion institucional. “Ta algo sumamente positivo ora Gobierno ta yama gremio, representante di dunadornan di trabao, sindicato y otro



organizacionnan pa sinta na mesa. E ta un plataforma importante pa feedback,” Dijkhoff a expresa.

El a menciona cu entre e punto discuti tin revision di Ley di Pensioen General y propuesta di ley pa brinda apoyo na famianan cu tin muchanan cu necesidad di cuidu intensivo. Segun Dijkhoff, e temanan aki ta un comienso di discusion mas amplio riba proteccion social y di bienestar.

Dijkhoff tambe a nota cu Gobierno a indica intencion pa recohe feedback adicional y continua e proceso den un manera estructura, dunando espacio pa

reflexion y aporte adicional di diferente sector.

Gremionan a mustra disponibilidad pa sigui participa activamente den e siguiente fase di Dialogo Social, cu meta di contribui na decisionnan cu ta fortalece estabilidad, proteccion social y desaroyo sostenibel di Aruba.

Minister President mr. Mike Eman a presidi e dialogo y tabata tin presente tambe Minister di Finzas y Economia mr. Geoffrey Wever, Minister di Turismo y Labor mr. Wendrick Cicilia y Minister di Salubridad y Asuntonan Social, drs. Mervin Wyatt Ras.

Durante vuelo Diadomingo anochi di Miami pa Colombia...

Boeing 787 Max di American Airlines a yega Medellin cu impacto di bala den hala

MEDELLIN: Un Boeing 787 Max 8 di American Airlines cu a bula Diadomingo anochi di Miami pa Medellin cu vuelo 923, posibelmente durante aterizahe lo a haya impacto di bala di arma na su hala banda drechi. E avion aki a sali di Miami pa 5:30 pm y a yega Rionegro (Medellin) pa 9:00 pm. E avion a keda drumi na Rionegro sperando e vuelo di regreso cu ta Dialuna mainta.

Ta personal di Ground Handler cu Dialuna mainta tabata revisa e avion, a bin descubri e impactonan aki di bala na e ‘aileron’ di hala drechi. Mesora a notifica gerencia y demas autoridad Aviacion Civil.


American Airlines a dicidi mesora cu nan ta saca e avion fo’i servicio y a manda otro avion pa recoge e pasaheronan cu ta bula Dialuna mainta for di Medellin (Rionegro)



bek pa Miami.

E buracan a wordo tapa cu “Aviation Speed Tape” y a wordo bula como un asina yama ‘Ferry Flight’ bashi bek pa Miami. No obstante e daño, e avion a bula toch na 36.000 pia riba Lama Caribe y a ateriza safe na Miami International Airport sin incidente.

“Durante un inspeccion di rutina, nos ekipo a identifica impacto di bala na e exterior di un di nos avionnan na Medellin,” un boletin di American Airlines a indica. “E avion a wordo saca mesora fo’i



servicio pa mas inspeccion y reparacion. Nos lo traha estrecho cu autoridadnan pa investigacion e incidente aki.”

Autoridadnan na Colombia a indica cu loke a socede no a laga ningun pasahero ni tripulacion lesiona. Pero un investigacion serio di seguridad ta andando pasobra e ‘aileron’ aki cu a wordo perfora, ta un componente critico pa control di vuelo y balansa. Ta investigando si acaso a los tiro ora cu e avion tabata anochi y marduga riba pista di Aeropuerto di Rionegro

(Medellin), of si acaso tabata den e fasenan di aterizahe of salida di e vuelo.

Na Miami, a revisa e daño y a opta pa manda e avion bek pa un Facilidat Avanza di American Airlines na Dallas pa haci un reparacion mas profundo. E avion e ora a bolbe bula como un ‘Ferry Flight’ pa Dallas. Aki ingenieronan ta bay revisa henter e estructura, y purba haya cuakier municion aden pa por haci un investigacion forensico. E imagennan ta un representacion visual di e daño.

Encuentro Exitoso di Soroptimist International Club of Aruba cu diferente profesional y organisacion



ORANJESTAD (AAN): Dia-mars anochi, Soroptimist International Club of Aruba (Sica) a tene un encuentro cu diferente profesional, miembran di diferente organisacion y algun Parlamentario pa comparti informacion riba e simposio cu lo tuma luga dia 7 di maart 2026, den conexion cu Dia Internacional di Hende Muhe.

Señora Magaly Maduro di

Sica, den un entrevista cu DIARIO a splica cu e encuentro tawata enfoca riba e tema central di e simposio: trauma, un realidad cu ta toca hopi hende, specialmente hende muhe, y tambe riba diferente problematica social cu ta afectando nos comunidad na Aruba. E intercambio di idea y experiencia a pone enfasis riba e necesidad di mas conscientisacion, educacion y colaboracion struc-



tural pa enfrenta e desafionan actual cu determinacion y vision.

Segun señora Maduro, e meta di e reunion tawata pa motiva e organisacionnan presente pa anima nan miembran y rednan pa participa activamente den e simposio. Sica ta kere cu conscientisacion y encuen-tronan asina ta pasonan esencial pa kibra silencio y crea un comunidad mas fuerte y resiliente.

Soroptimist International ta un organizacion mundial dedica na mehora bida di muhe y mucha muhe via educacion, liderazgo y empoderamento. Localmente, Sica ta activo durante henter aña cu diferente proyecto, campaña y eventonan cu tin como meta pa crea oportunidadnan, brin-

da sosten y impulsa cambio positivo duradero.

Sica ta invita henter comunidad, homber y muhe, pa bin forma parti di e simposio dia 7 di maart. Cu e simposio aki, Soroptimist International Club of Aruba ta reafirma su compromiso pa sigui traha di forma consistente y strategico na bienestar di e hende muhe na Aruba y crea espacio na unda temanan relevante y urgente por wordo trata cu seriedad y profesionalismo.

Ademas, Sica ta anima pueblo



di Aruba tambe pa bira miembro y forma parti di e movimiento aki cu ta pone dignidad, resiliencia y progreso na centro di nos agenda social.

Pa mas informacion y reservacion pa e simposio, contacta señora Magaly Maduro na telefon 561-9100.

Sietske van der Wal di ACF:

Mescos cu fin ROP y ROPV den tera, mester bin algo similar den lama



ORANJESTAD (AAN) Señora Sietske van der Wal, Funcionario di ACF (Aruba Conservation Foundation), den entrevista cu DIARIO tocante Biodiversidad y arecanan natural cu mester designa como arecanan proteha, a señala cu opcionnan tin hopi, pero esey ta un decision cu por tuma di un dia pa otro. “Awo nos a inicia e proceso. Nos tin Blue Marine Foundation cu ta yuda cu esey pasobra nan tin un monton di experiencia den esaki, y den busca e solucion cu por funciona pa tur hende; nos tin Departamento Natuur & Milieu (DNM) cu mester prepara e documentonan pa esaki por formaliza como ley, Aruba conservation Foundation, tambe lo asisti a base di nan experiencia como manejador actual di e Parke Marino”, señora van der Wal a señala.

Señora van der Wal a agrega cu pa motibo cu tin deseo pa mas desaroyo den lama, ta hopi importante pa nos tur aliña y bin cu un structura.

“Manera nos tin ROP y ROPV riba tera, unda ta bisa ‘esey ta pa turismo, esey ta pa running, esey ta pa naturaleza’ nos tin cu bay haci algo similar den lama. Anto, e ora ey e ta bay bira mas duidelijk ora kier haci un proyecto, unda esey por sosode. Awo-raki den lama, hopi biaha e proyecto ta bin ariba, unda mester hacie; eigenlijk ningun hende sa, anto bo no por haci nada definitivo, pasobra e no ta asigna ainda. Claro, ta mas practico pa wak si e mesun modelo cu a wordo traha awo ta fix den e deseo, pero si ta resulta cu esey no ta e caso, anto mester hal’e afo”, segun señora Sietske van der Wal, di ACF, a splica.

Casonan Penal pa wordo trata den Corte di Husticia na Aruba

Casonan di Diahuebs 26 Februari 2026



Horario	Sospechoso	Acto Castigable
8:30 am	J.A.J.	Sospechoso J. ta wordo acusa di maltrato cu un arma riba 26 di Februari 2025.
9:15 am	J.S.S.H.	Sospechoso H. ta wordo acusa di a menaza un persona cu morto na September 2025.
10:00 am	E.M.	Sospechoso M. ta wordo acusa di maltrato cu un arma riba 28 di Februari 2025.
10:40 am	A.F.M.	Sospechoso M. ta wordo acusa di ladroncia riba 2 di September 2024.
11:15 am	A.J.G.	Sospechoso G. ta wordo acusa di maltrato di un persona riba 23 di Maart 2025 y 9 di December 2025.
1:30 pm	J.J.C.H.	Sospechoso H. ta wordo acusa di ladroncia riba un turista riba 14 di Januari 2025.
2:10 pm	J.J.H.	Sospechoso H. ta wordo acusa di comete destruccion riba 12 di April 2025.
2:50 pm	G-K.M.K.	Sospechoso K. ta wordo acusa di a viola ley di droga riba 29 di Juni 2025 y tambe 7 di Augustus 2025.

ORANJESTAD (AAN): For di Ministerio Publico, esaki ta e lista di caso penal cu lo wordo trata riba Diahuebs 26 Februari 2026 den Sala di Corte di Husticia na Aruba. E informacion aki a wordo suministra door di Ministerio Publico.

Señora Dalgis Montalvo di Stichting Hunto:

Mester ta mas proactivo pa preveni y atende cu problematica di adiccion y suicidio

ORANJESTAD (AAN): Señora Dalgis Montalvo di Stichting Hunto, den un entrevista recien cu DIARIO a enfatisa cu no mester warda te ora cu e problematica di adiccion y suicidio ta asina grandi na unda cu e ciudadano cu e problema di adiccion of cu pensamentonan di suicidio ta sinti su mes den un skina unda ya e no ta mira un salida.

Comunidad, famia, organizacionnan y Gobierno mester hunga un rol mas proactivo pa preve-

ni y atende situacionnan asina.

Segun señora Montalvo, na Aruba tin hopi hoben den adiccion como tambe cu problema cu husticia pa diferente motibo.

Hopi hoben como adulto ta sufri di depresion y ansiedad y no sa con pa deal cu e situacion.

Tambe tin e problematiza na unda adultonan no tin sosten di mayornan, yunan of famianan mas. Tur esakinan ta factornan serio cu ta contribui na e problematica, y



cada caso ta rekeri un tipo di guia y intervencion diferente.

Stichting Hunto ta kere firmemente cu prevencion, amplia e ekipo pro-

fesional y actua pronto, prome cu e situacion bira mas grave, mester keda prioridad pa proteha y guia nos ciudadanonan. El a agrega cu, loke ta

trata e parti di adiccion, fundacion ta ricibiendo mas personanan nobo, mayoria hoben.

Segun señora Montalvo, awendia, hopi hoben no por of no sa con pa enfrenta e problematicanan cu nan ta topa, ni ta haya e guia adecua.

Hopi biaha nan ta perde speranza y ta tuma decisionnan drastico en bes di purba un tiki mas. Esaki ta un señal alarmante cu, si no ta atende cu urgencia, por sigui crece den nos sociedad.

Accident entre tres auto riba caminda di Hooiberg pa Santa Cruz

ORANJESTAD (AAN): Tabata den oranan di merdia, cu Polisnan di Santa Cruz a haya nan ta cera e caminda di Hooiberg pa Santa Cruz, e pida entre e brug cu tin mey-mey di NAPA Autoparts y Mai-ky's. Esey debi cu tabatin un accident entre tres auto.

Ademas di e unidadnan di Polis di Santa Cruz, a nota cu Polis di Trafico tambe a presenta na e lugar. E vehiculonan envolvi tabata un Toyota Camry, un pickup y un Nissan Tiida.

Testigonan a splica cu e Toyota Camry a subi caminda pa "crusa" of bay otro banda. E pickup riba



caminda grandi, mirando esaki a reduci su velocidad y pero e Nissan Tiida biniendo tras di e pickup no a paga tino, no por a regla su velocidad, y a dal basta duro patras di e pickup. E Toyota Camry

tambe a dal parcialmente contra e Tiida na su banda robes.

Un total di tres persona a resulta herida y Paramediconan cu a yega e lugar di accident a trata nan ey mes.

Bari di sushi riba acera di Royal Plaza Mall a surpasa e top di susedad



ORANJESTAD (AAN) Riba acera di e edificio Royal Plaza Mall, net dilanti entrada na e Terminal di Arubus, tin atrobe un bista mahos, unda cu un biaha mas mester menciona e palabra "berguenza", y mas tanto cu esaki ta un caminda hopi transita pa local y turistanan.

Esta, un bari di sushi cu a yena te e top y surpasa esaki cu te riba e vloer por mira desperdicio benta.

Responsabilidad di ken esaki ta? Di e contratista cu ta drechando e caminda aki? Of di e instancia di gobierno cu mester percura pa mantene e camindanan publico liber di susedad? Un bista mahos cu ya tin tres dia largo dunando su show!

Parlamentario Eduard Pieters (PPA) reflexionando riba Dia di Idioma Materno:

Papiamento no mester ta djis un simbolo of adorno di temporada

ORANJESTAD (AAN): Diasabra cu a pasa, esta 21 di februari, mundo a duna reconocemento na Dia Internacional di Idioma Materno, cu ta dia reconoci pa UNESCO pa promove diversidad linguistico y multilinguismo. Pa parlamentario Eduard Pieters, cu tin mas di 20 aña den e veld di educacion, e dia aki no ta un fecha ceremonial of djis di e dia ey pa celebra of conmemora. Ta un recordatorio politico cu Aruba mester trata Papiamento no solamente como idioma di cas, pero como instrumento di igualdad, aprendizage y identidad nacional.

Aruba tin un bentaha unico: nos ta multilingual pa naturalesa. Pero e pregunta serio y critico ta: Nos ta uza e fortaleza ey pa crea oportunidad? Of nos ta laga e sistema linguistico fomenta desigualdad?

Papiamento: Idioma oficial, pero lucha ta sigui

Papiamento ta e idioma mas papia na Aruba y e ta un di nos idiomaan oficial hunto cu Hulandes, desde mei



2003. Pero “oficial” riba papel no ta automaticamente “igual” den practica. Si un mucha ta drenta scol cu su idioma materno ta Papiamento, pero e sistema no ta fortalece alfabetisacion y comprension profundo den e idioma ey, nos ta creando un desbentaha desde dia uno. E resultado ta visibel: mas frustracion, mas atraso den lectura y mas riesgo cu algun mucha ta perde confianza den su mes.

Educacion: Un paso adelante, pero mester consistencia

Un desaroyo importante anuncia: como parti di e maneho nobo di idioma, a introduci alfabetisacion na Papiamento oficialmente na klas 1 na tur scol basico pa aña escolar 2024–2025. Esaki ta un paso cu PPA y Eduard Pieters por reconoce como un progreso real, pasobra ta pone e idioma materno na e fundeshi di aprendizage.

Pero djis un maneho so no ta suficiente! Implementacion ta loke ta separa vision for di propaganda. Un resumen di e **Integraal Taalbeleid (2024)** ta pone un punto fuerte y cla:

pa e maestronan por uza Papiamento y Hulandes como e idiomaan di instruccion den enseñansa basico, nan mester domina ambos idioma riba un nivel B2/C1. Si nos no inverti serio den formacion, coaching y material di calidad, e cambio lo keda superficial y e mucha lo paga e prijs y sufrir e consecuencia un biaha mas.

Dia di Idioma Materno ta un prueba di gobernansa

Dia di Idioma Materno no ta pa poesia y propaganda so; ta pa implementa, salvaguardia, fortifica y evalua maneho. Algun pregunta politico cu Eduard Pieters ta lansa:

Con nos ta midi progreso? (e resultadonan di lectura, retencion, bienestar di mucha)

Ken ta responsabel pa calidad di implementacion? (ministerio, SKOA, DPS, IPA, formacion docente, inspeccion)

Cuanto fondo ta bay realmente na Papiamento den klas? (material, tempo, evaluacion)

Si Aruba ta serio riba e aspecto di dignidad, nos mester

stop cu e idea cu Papiamento ta “bon pa cultura” pero no “fuerte pa scol”. Esaki ta exactamente e tipo di mentalidad cu ta crea barera social. Finalmente Eduard Pieters kier enfatisa cu Papiamento ta mas cu idioma. Papiamento ta e forma cu nos muchanan ta pensa, ta sinti, ta interpreta mundo.

No ta pornada cu UNESCO ta recorda nos tur aña, pa protega idioma materno, paso asina ey bo ta protega dignidad humano y futuro di comunidad.

Pa Eduard Pieters, e mensahe di diasabra pasa ta actual pa tur aña: **Papiamento den educacion no ta un opcion mas, sino un derecho cu nos mester respeta y acepta.** Aruba mester sigui fortalece alfabetisacion den Papiamento, eleva nivel di e maestronan y pone e metanan midibel cu transparencia. Pasobra ora nos sembra aprendizage den idioma cu un mucha ta compronde mihor, nos no ta solamente defendiendo cultura, nos ta construyendo igualdad.

DUO lo ta bishitando Aruba

Studiantenan Caribense ta bay Hulanda miho prepara

ORANJESTAD (AAN): Informacion nobo cu DIARIO ta dispone di dje ta indica cu Dienst Uitvoering Onderwijs (DUO) ta bishitando e area Caribense di 9 te cu 27 di maart.

Durante e bishita DUO lo habri oficinanan di servicio temporal y lo organiza encuentronan di informacion tocante financiamiento di estudio. Ademas lo duna atencion tambe na e herment nobo di Gobierno Central cu ta yuda studiantenan prepara nan mes pa nan biahe pa Hulanda.

Annualmente mas di 1.500 hoben di e area Caribense ta cuminsa un estudio na Hulanda. Pa laga e transicion aki cana mas suave posibel, Duo, den colaboracion cu otro organizacionnan (gubernamental), na 2025 a desaroya un herment special online. A traves di e website aki e studiantenan ta haya un resumen

cu informacion tocante nan derechonan, cua asuntonan nan mester regla y unda nan por haya ayudo. E website ta:

www.bit.ly/studiened

Tin bon experiencia cu e

herment! “Nos ta mira cu studiantenan Caribense y nan mayornan ta experiencia e herment como sumamente balioso y cu studiantenan pa e motibo aki ta biaha miho prepara pa Hulanda”, segun

Monique Hoogerwerf, coordinado pa e area Caribense na DUO. “Esey ta aporta na un bon comienso di nan estudio.”

Encuentronan di informacion: DIARIO a haya confirmacion cu na luna di Maart, DUO lo tene encuentronan di informacion na Sint Maarten, Aruba, Curaçao y Bonaire. Durante e encuentronan aki futuro studiantenan y nan mayornan ta ricibi informacion tocante financiamiento di estudio, e burgerservicenummer (BSN) y otro asuntonan practico cu mester regla ora ta trata di un estudio na Hulanda.

Oficinanan di servicio temporal: DUO lo habri oficinanan di servicio temporal tambe na Saba, Sint Eustatius, Sint Maarten, Bonaire y Aruba. Na Curaçao desde april 2025 ya caba a habri un oficina di

servicio pa un periodo mas largo.

No solamente studiantenan, pero tambe ex studiantenan por acudi aki cu nan preguntanan.

Nan por haya mas informacion tocante pago bek di nan debe di estudio, por ehempel den valuta local contra gastonan mas abou of reduccion di e suma mensual.

E oficina di servicio ta pa personanan cu tin problema cu pago of tin un atraso den pago, pasobra aki nan ta haya ayudo di forma personal y por busca solucion adecuado hunto cu un colaborado.

Mas informacion tocante e encuentronan di informacion y e oficinanan di servicio por haya riba e website aki: duo.nl/bezoekcariben

Studiantenan ta ser pidi pa tene bon cuenta cu tur esaki.



Fundacion Siñami Paso pa Paso Aruba di bishita serca Prome Minister



ORANJESTAD (AAN): E siman aki, Prome Minister Mike Eman a ricibi señor Carlos Falla, representante di Fundacion Siñami Paso pa Paso Aruba, den un bishita formal caminda a presenta un proyecto educativo enfoca riba formacion di balornan y desaroyo integral di mucha y hoben.

Durante e encuentro, señor Falla a ofrese e buki titula “Un Tesoro pa mi Bida”, un publicacion di 156 pagina cu ta enfoca riba 12 balor fundamental manera Husticia, Perseverancia, Integridad, Pordon, Humildad, Puntualidad, Sinceridad, Responsabilidad, Solidaridad, Lealtad, Amor, Berdad y Respet. Cada balor ta

representa den un capitulo separa y adopta pa diferente compania of organizacion.

E buki no solamente ta promove lectura, pero tambe tin ehercicionan interactivo dirigi na fortificacion di habilidadnan social y emocional, psicomotricidad, habla y lengahe. E material didactico ta inclui actividadnan pa mehora atencion, concentracion, expresion, comprension, lectura y escritura, ademas di reconocimiento di emocionnan, tecnicanan pa regula emocion, alfabetisacion, nocion di number, derechonnan di mucha y importancia di famia.

E fundacion a indica cu e fondo recauda cu benta di e buki lo contribui na continuacion

di nan proyecto integral despues di scol. E iniciativa aki ta enfoca riba guia profesional pa un grupo vulnerabel di mucha y hoben cu discapacidad intelectual leve (L.V.B.) y nan famia, cu apoyo di psicologo, logopedista y neuropedagoog. E fondo lo ta inclui como contribucion propio pa proyecto 2026–2027 na CEDE Aruba.

Prome Minister a aprecia e iniciativa y e compromiso di e fundacion pa fortalece formacion di balornan den nos comunidad, reconociendo e importancia di inversion den desaroyo personal di nos muchanan como base pa un sociedad mas fuerte y responsable.

Aruba ta celebra 50 aña di su Himno Nacional:

“Aruba Dushi Tera” como bos di identidad y union

ORANJESTAD (AAN): Na 2026, Aruba ta conmemora 50 aña di su Himno Nacional, “Aruba Dushi Tera”, adopta oficialmente riba 18 di maart 1976, mesun dia cu nos bandera nacional. E adopcion di e himno y bandera a marca un momento decisivo den e afirmacion di identidad cultural y nacional di Aruba.

Anteriormente, como cu Aruba tabata forma parti di Antias Hulandes, nos tabata uza e Himno di Antias Hulandes. E deseo pa un himno propio a yega mas fuerte den e añanan 1950, ora cu dos musiconan hopi conoci na Aruba, Juan Chabaya “Padu” Lampe (letra) y Rufo Wever (musica), a compone un wals cu un melodía tipico di nos isla den añan 1951–1952. Nan proposito tabata pa crea un cantica cu ta expresa amor pa patria y lanta sentimento patriotico den cada Arubiano.

E grupo “De Trupialen”, bou direccion di Frere Alexius, a hinca “Aruba Dushi Tera” den nan repertorio, lo cual a aumenta su popularidad. Na 1954, Radio Kelboom a graba e cantica riba un disco 78 r.p.m., canta pa De Trupialen y acompaña riba piano pa Padu Lampe, haciendo e

conoci riba tur isla. Desde e momento ey, e cancion tabata resona na e ocasionnan importante y e ceremonianan oficial.

Dia 25 di februari 1976, Gobierno Insular a instala un comision pa recomenda oficialmente “Aruba Dushi Tera” como Himno Nacional den ritmo di wals. E comision a propone pa añadi un ultimo couplet, inspira pa Hubert “Lio” Booi, cu e frase: “*cu Dios por guia y conserva su amor pa libertad*”, resaltando e cordialidad di nos pueblo y su balor pa libertad.

Riba 16 di maart 1976 a aproba oficialmente “Aruba Dushi Tera” como Himno Nacional. Dos dia despues, 18 di maart 1976, durante un manifestacion oficial den Stadion di Wilhelmina na Dako-



ta (awor Stadion Guillermo Prospero Trinidad), e himno a ser proclama oficialmente. Pa di prome biaha e himno a resona como himno oficial, canta pa e coro di Maybeline Arends Croes, cu acompañamento di Orkesta Filharmonico di Aruba bou di direccion di Hesus Maria “Joy” Kock. E fecha 18 di maart tambe ta

conecta cu e Mesa Rondo na Hulanda di 1948, ora cu pa prome biaha un mocion a ser entrega na Reina Juliana pa boga pa autodeterminacion di e pueblo Arubano, lidera pa Shon A. Eman y firma pa 2147 Arubiano. P’esey, 18 di maart a bira Dia di Himno y Bandera, un dia nacional di Aruba.

Significado cultural y linguistico

Un di e elemento mas importante di e himno nacional ta cu e ta skirbi na Papiamentu, idioma materno di mayoria Arubiano. Esaki a fortalece e posicion di Papiamentu como pilar di identidad nacional y cultural, y a duna e himno un caracter autentico y profundamente local.

“Aruba Dushi Tera” ta expresa:

- amor pa e isla y su naturalesa,
- orguyo di identidad cultural,
- union entre diferente origen,
- y un compromiso moral pa cuida e pais.

50 aña di bos nacional

Despues di 50 aña, e himno nacional a acompaña Aruba den e momentonan di orguyo, desafio y celebracion: desde e ceremonianan oficial te evento deportivo y cultural. E aniversario di oro ta invita pa reflexiona riba e significado di e letra y e responsabilidad cu ta bin cu amor pa patria.

E celebracion di 50 aña di “Aruba Dushi Tera” no ta solamente un homenahe na pasado, pero un invitacion pa pasa e balor di respet, union y responsabilidad pa e futuro generacionnan.



Centro Famia Piedra Plat cu su proyecto nobo 'Pasadia pa Adulto Mayor'

ORANJESTAD (AAN): For di luna di October 2025 a cuminsa cu un soft opening como un pilot program pa e Pasadia pa Adulto Mayor den famia. Den un estrecho cooperacion cu departamento di ouderenzaken Aruba, FCFPP a cuminsa cu e Proyecto aki.

Recientemente esta dia 12 di februari ultimo minister Mervin Wyatt Ras di asuntonan social y adulto mayor a haci e apertura oficial di e bunita Proyecto aki na FCFPP.

Awor ta asina leuw cu ta cuminsa cu 2 lokalidad pa ricibi e adultonan mayor, uno na Piedra Plat y e otro na Soledad y den

e lunanan cu ta sigui, lo bay na habri di tres y di cuater Pasa dia pa Adulto mayor den famia conforme cu ricibi e apoyo di gobierno di Aruba via Ouderenzaken.

Pa inscribi por pasa personalmente na e ofesina principal situa na Piedra Plat # 50, entre 10'or di mainta pa 5'or di atardi.

E pasadia ta habri for dialuna pa diabierna di 8'or pa 2'or di merdia, e adulto mayor por scohe cuanto biaha pa siman e kier bin. E programa di siman lo ta hopi varia cu diferente actividadnan, den e posibilidad di cada adulto mayor. E pasadia ta inclui desayuno y



lunch.

Pa mas informacion por tuma contacto na 585-5544 of 699-5545 dentro di e horario di oficina y por e-mail tambe na: centrofamiapp@gmail.com

Fundacion Centro Famia Piedra Plat ta traha ariba un base comunitario pa e famia completo riba terenonan educativo y social pa comunidad di Aruba sin fin di lucro.



Señora Sietske van der Wal:

Prome cu 2030 mester asigna alomenos 30% tera y 30% lama como areanan natural proteha

ORANJESTAD (AAN) Señora Sietske van der Wal, di Aruba Conservation Foundation, den entrevista cu DIARIO, a sigui splica cu Blue Marine Foundation, cu ta yuda Departamento di Naturaleza y Medio Ambiente di Aruba (DNM) pa yega na un acuerdo di 2030, cu ta cay bao di Diversidad Biologico, y cu pa prome cu aña 2030 mester asigna alomenos 30% di tera y 30% di lama, como areanan natural proteha.

Señora van der Wal a señalá cu e parti mas importante pa realiza ta cu e 30% mester hacie di un manera cu e por funciona pa Biodiversidad.

“Bo mester wak na unda tin mas hopi biodiversidad



pa selecta e areanan ey, of areanan esencial pa biodiversidad; y no tur biodiversidad ta tur caminda. Pues, bo kier areanan representativo di bo Biodiversidad pero tambe mester wak e

aspectonan economico, pasobra nos tin hopi hende cu ta haci uso di nos lama”, van der Wal a señalá.

El a agrega cu, cu esey a inicia e proceso siman pasa, unda cu di estudionan por

saca afo e informacion di nos biodiversidad y ecologia cu tin, y tambe ta saca afo ki informacion falta, pero ainda falta e informacion di e usuarionan, pa tin e diferente señalnan pa wak

unda por asigna e areanan aki.

“Nos sa si, cu pa dedica suficiente proteccion na e biodiversidad completo di Aruba, bo mester bay pa un deseo cu ta rond di Aruba, anto esey no kiermen cu nada no mag. Kiermen cu rond di Aruba ta haya un regulacion y bo ta bay haya areanan designa pa diferente actividad”, Sietske van der Wal a indica.

El a agrega cu tur hende na Aruba sa cu den e costa west tin hende ta landa, snorkel, y jet sky tur riba otro, y esey no ta un bon idea; y door di asigna areanan specifico bo por regula y structura cosnan asina na un miho manera.

Ministerio di Infraestructura trahando riba cambionan necesario a corto plaso di ROPV



ORANJESTAD (AAN): Minister di Infraestructura a indica cu, paralelo na e proceso di preparacion di un ROPV nobo, ta mira e necesidad pa trata cierto cambionan a corto plaso den e reglamentonan actual pa facilita realisacion di proyectonan prioritario.

Actualmente e decreto legal vigente ta limita e posibilidad pa realiza cierto tipo di construcion y instalacionnan, entre otro riba punto di altura di edificio y uzo di tereno.

Den cierto caso, e reglamentonan actual no ta permiti solucionnan tecnico cu ta necesario pa e funcionamiento di infraestructura moderno, manera fluho, circulacion di proceso y instalacion di utilidadnan.

Minister di Infraestructura, drs. Rene Herde a indica cu e cambionan cu ta wordo considera ta di caracter tecnico y puntual y ta dirigi na posibilidad pa implementa proyectonan cu awor no por wordo realiza bou e reglamentonan vigente.

E ahustenan aki lo wordo trata den e marco dje ley existente y tin como meta pa crea solucionnan practico a corto plaso den e trayectoria pa yega na un ROPV nobo.

Ministerio di Infraestructura a subraya e importancia pa trata e punto nan aki, tumando na cuenta e necesidad pa desaroyo di infraestructura y e interes cu ta hiba na realisacion di proyectonan actual y den futuro.

Tienda di Educacion cu exitoso workshop encuanto comunicacion no-violento

ORANJESTAD (AAN): Durante luna di Februari, Tienda di Educacion na Aruba a ofrece un workshop tocante comunicacion positivo, conoci como ‘comunicacion no-violento’, na e lidernan di grupo di Bureau Tra’i Merdia.

Ta trata di esnan di Tra’i Merdia di Scol Basico Washington, y Scol Primario Kudawechea.

E workshop duna na e lidernan di grupo di Bureau Tra’i merdia di e dos scolnan aki, a haya nan ta participa activamente durante e mainta interactivo y educativo aki.

Tienda di Educacion ta gradici nan pa e invitacion y ta premira pa mas momentonan asina yena cu educacion, informacion y formacion di e lidernan di grupo. Cada participante a ricibi un certificado.



RESULTADO DI SORTEONAN PA CORTESIA DI CADENA ALEXANDER
DIARANSON 25 FEBRUARI 2026

DIARIO			
7079	4915	MERDIA 1571	ANOCHI 5553
0723	2357	5159	3122
5964	2769	4476	5418
		MULTI- X	
		X2	X2
MERDIA 9737	ANOCHI 0543	MERDIA 091	ANOCHI 924
		X2	X2
		MERDIA 3237	ANOCHI 2211
		X3	X3
9534			
26-29-06-15-07			

BUSCA PALABRA

P T O R O L A O O M O A
O I I C P I O O C C I R
A T S I O I R A U Q A N
R C V C G E M I N I I A
B O R O I R A T I G A S
I I G I O S U S E I R A
L P O I G Q O O C V N G
I R G P L C U A R I S A
N O R L I N N I R S I E
R C I E A C I G E R I C
R S V O E G S O R U A T
C A P R I C O R N I O P
B C I A R G L O S I O O
R O A I E L P N A C P R

Capricornio	Sagitario	Cancer	Aries
Aquario	Tauro	Virgo	Leo
Piscis	Scorpio	Gemini	Libra

> SUDOKU <

King Classic Sudoku

	1				3	2		
	5	6	4					
			6	9				
		8						
5		4						
					7		9	8
	9		3	5			2	
4		5		1	2		6	3
3			9	4		1		

Difficulty: ★★★ 7/26

Diasabra mainta lo reparti paña

ORANJESTAD (AAN): Esaki ta un informacion importante, como cu Diasabra awor dia 28 di Februari lo tin partimento di paña un biaha mas.

Asistencia Social Noord ta parti paña Diasabra awor.

Esaki lo tuma lugar bao afdak di Asistencia Social Noord for di 7:30 am pa 9:30 am. Esaki ta den cura, net panort di Misa di Noord.

Tur esnan cu ta interesa por pasa Diasabra mainta y recoge loke nan ta desea.

Pero tuma bon nota cu bo tin di bay cu saco of tas pa pone articulonnan aden.

Hari Un Tiki

Bernardo a puntra:
—“Mami, mami.. hende sa castiga un mucha cu no a haci nada?”
E mami a contesta:
—“No mi yiu, pakico bo ta puntra esey?”
Bernardo a contesta:
—“Pasobra mi kier bisa mami cu mi a haci nada di mi huiswerk.”

Solucion Anterior

1	8	4	6	2	9	7	3	5
7	6	3	5	4	8	2	1	9
9	2	5	1	7	3	4	8	6
2	5	6	7	9	1	3	4	8
8	3	1	4	5	2	9	6	7
4	9	7	8	3	6	1	5	2
3	1	9	2	6	5	8	7	4
6	7	2	3	8	4	5	9	1
5	4	8	9	1	7	6	2	3

Difficulty: ★★ 7/25

LOTTO

E LOTERIA DI ARUBA

— Resultado Diaranson 25 Februari 2026

19

13

05

11

30

1^{er} Premio: Tin 0 ganador Jackpot

2^{do} Premio: Tin 0 ganador Match 4+

3^{er} Premio: Tin 4 ganador Match 4

4^{to} Premio: Tin 198 ganador di Afl. 12,00

Joker

24

Proximo sorteo 28 FEB 2026
Afl. 4,00 pa ticket
AFL 210.000,00

1 Premio: 5 Bon

2 Premio: 4 Bon + Joker **Por yama 583-4475 pa haya e resultado.**

3 Premio: 4 Bon

4 Premio: 3 Bon

Letter ganador pa ticket gratis: **(C)**

EMERGENCIA NA ARUBA

Diahuebs 26 Februari 2026

DOCTER NA WARD
SAN NICOLAS:
Pa San Nicolas, Docter lo ta na H.A.P. ImSan.
Dokter tey for di 6'or di anochi te 10'or di anochi.

BOTICA NA WARD
PARIBA DI BRUG:
Botica 4 Centro Medico
Bernhardstraat 55
Telefon 584-5794
Telefon: 584-5798

ORANJESTAD:
Pa Oranjestad, Docter lo ta na Huisartsenpost H.A.P. na Hospital. Docter tey di 6:30 pm te cu 10:30 pm.

PABAO DI BRUG:
Botica Eagle
Caya Punta Brabo 17
Telefon 587-9011

DIARIO

Loke Tempo ta Mustra....

• Aumento leve di humedad na nivel mas abao di atmosfera awe mainta por pusha awacero breve riba Aruba, pero sobra di dia lo ta seco cu stof di Sahara.

• Biento di Pariba basta fuerte entre 20 y 39 km/h, cu rafaga te 61 km/h. Lama modera cu ola entre 4 pa 6 pia.

ALMANAC

Bahada y salida di solo na Aruba

—26 Februari 2026
Solo ta baha: 6:49 p.m.
—27 Februari 2026
Solo ta sali: 6:57 p.m.
Solo ta baha: 6:49 p.m.

Lista di Crusero di bishita na Aruba

—Diahuebs 26 Feb. 2026:

Costa Pacifica:
(07:00 - 22:00)
Serenade of the Seas:
(08:00 - 18:00)
AIDA Sol:
(08:00 - 18:00)

—Diabierna 27 Feb. 2026:

Aurora:
(07:00 - 23:00)
Brilliance of the Seas:
(08:00 - 21:00)
Silver Spirit:
(08:00 - 21:00)

SOS TELE AYUDO

Tel: 583-1190

Anonimo y Confidencial

Pober mucha a keda encarcela pa 4 luna na Texas

Inmigracion na Miami a detene un mucha muhe di 9 año cu tabata rumbo pa Walt Disney World

• **Aki por mira e peligro di viaha pa Florida e lunanan aki**

MIAMI: E motibo cu miyones di turista procedente di Europa, Canada, Asia, y Sur America ta cancelando tur nan vakantie pa Orlando na Florida... ta basa riba loke ta pasando na e estado popular aki na Merca desde cu e pais a haya un President nobo.

Toch tin algun turista cu ta riesga di viaha toch, y ta haya nan inocentemente ta wordo deteni. Ta numeroso turista di e.o. Puerto Rico, Alemania, Irlanda, y di Jamaica a wordo deteni door di oficialnan di Immigration and Customs Enforcement, conoci como 'ICE'.

Mucha di Colombia: E potret aki a wordo saca na Augustus 2025 ora cu e mucha muhe Maria Antonia Guerra Montoya di Colombia a bishita Walt Disney World pa prome biaha. El a goza inmensamente di e vakantie aki den Orlando, te cu e mucha aki di 9 año a keda roga su mama pa e bay bek pa bishita e celebracion anual di Halloween na Magic Kingdom, yama "Mickey's Not-So-Scary Halloween Party".

Su mama Colombiano a percura pa su yiu a obtene legalmente su Visa di Turista, y asina a viaha un biaha mas for di Colombia rumbo pa Florida. E vuelo a ateriza na Miami International Airport.

Maria tin solamente 9 año di edad, cu un Visa legal di turista, pero oficialnan di ICE a detene na Aeropuerto. Nan a bay cu ne den un oficina apart pa wordo interroga, mientras cu su mama a wordo hiba na un oficina separa y interroga.

Maria ta corda cu nan a cuminza haci'e pregunta, y e mes como un criatura di 9 año no tabata sa con pa contesta nan. Unico cos cu e mucha di 9 año tabata por a bisa ta su fam, su fecha di nacemento, y number di su mama y fecha di nacemento, y cu e ta di Colombia, y esey ta tur cos. E interrogacion a dura oranan largo.

E celular di e mama a wordo confisca, y nan dos a wordo poni den un cel di detencion pa 42 ora, prome cu nan a wordo poni abordo di un avion cu a hiba nan pa Texas. E pober mucha aki a wordo poni den e

campo notoriamente desagradabel di detenidonan na Dilley (Texas) pa 4 luna largo.

Cuatro luna sin contact: Ningun hende tabata sa unda e mucha tabata, ta pa casualidad un reportero di e publicacion ProPublica a bay eynan, y el a entrevista e mucha Maria y su mama.

Aki a bin haya sa cu na October e mucha tabata hopi feliz cu e tabata abordo di avion pa bolbe bay bishita Walt Disney World, y pasa tempo cu su mama kende ta bibando na Merca desde 2018 y ta casa cu un Mericano y cu a aplica pa un Green Card.

Maria ta un mucha cu ta vegetariano, y tabata come principalmente boonchi. E mucha a conta e reportero cu el a bay fo'i tino dos biaha desde cu el a yega na e centro desagradabel aki. Su mama a describi su yiu di ta spierta di biaha den marduga ta yorando, cu miedo cu e lo por wordo separa di su mama, of nunca e ta bandona e centro di detencion.

Mucha ta culpa su mes: Den un carta, Maria a skirbi "cu mi ta aki den.. ta mi fout... pasobra ami kier a djis bay cu vakantie como un famia normal. Mi no ta comiendo bon, mi no ta hayando educacion, y mi ta haya falta di mi miho amiga Julieta, mi wela, y mi scol, y ami kier bay cas bek."

E relato aki awor a sali recien via e canal Telemundo y tambe na Miami New Times, y ta demostra e peligro grandi cu turistanan cu ta viahando pa Merca ta pasando aden. Bo por wordo deteni, djis pasobra bo ta papiando un idioma cu no ta ingles! Djis pasobra bo color di cuero ta maron ora cu bo ta tras di stuur coriendo riba Turnpike of riba I-95 freeway na Florida.

Pesey turismo ta cayendo masha mahos mes na Florida. Restaurant y lugarnan di atraccion ta cerando bastante na Tampa, Sarasota, Fort Myers, y hasta na Key West. Hopi hende di exterior cu ta bay subi cruiseship, ta evitando Fort Lauderdale y Miami, y ta buscando barconan cu awor a cuminza acepta pasaheronan na e.o. Barbados y tambe Cu-



raçao.

E storia di Maria ta kibra curazon, y ta un di e storianan cu ta hasta ponebo sanger herbe di e inhusticia y crueldad haci riba hendenan cu a busca documentonan valido pa viaha pa Merca, y tur esey pa ningun clase di motibo.

Recien a sali informacion di un abuela di 65 año di Inglatera cu ningun background criminal, ta deteni pa seis siman caba, no obstante e tin un Visa valido pa viaha pa Merca. El a biaha pa Merca pa pasa dianan di vakantie, aunke algun hende a adverti'e riba e peligro. El a ignora nan y a viaha, y toch a wordo deteni.

Vakantie destrui: E periodista Mica Rosenberg di ProPublica a skirbi cu ora el a papia cu e mucha Maria encuanto su plannan na October na Florida, su cara a bira briyante y a splica con e tabatin planea un disfraz di 101 Dalmatians pa e evento di Halloween na Walt Disney World. E tabatin plan pa bisti como Cruella de Vil, mientras cu su mama y padrastro tabata planea di bisti como e cachonan.

Pero ora cu el a ateriza na Miami International Airport dia 2 di October, e viahe a wordo interumpi na e forma di mas mahos cu por. Envez di wordo reuni cu su Mama despues di aterizahe, segun e mucha el a wordo intercepta pa oficialnan di ICE mientras e tabata wordo escolta como un mucha menor viahando door di un Stewardess. Asina nan a bay cu ne na un oficina pa interrogacion.


Miami New Times a purba di check cu CBP pa haya sa ta cuanto mucha menor di edad a wordo deteni na Miami International Airport desde cu Mer-

ca tin un president nobo. Pero nan no kier duna contesta riba e pregunta.

Ora cu e periodista di ProPublica a topa cu e famia na Texas, nan tabata deteni pa casi 4 luna.

DHS a bisa cu e mama a wordo deteni, pasobra na 2018 el a sobrepasa su tempo di estadia na Merca, y cu den pasado el a wordo deteni pa ladronia. Pero documentonan di Corte a indica cu tur e acusacionnan ey despues a wordo retira.

Ta danki na un Hues di Inmigracion, nan a ofrece e famia aki cu nan por regresa



Colombia pagando nan mesun pasashi, y evita un deportacion formal, y preservando su abilidad di sigui cu su aplicacion pa Green Card di exterior. Dia 6 di Februari, tanto e mucha y su mama a bula bek pa Colombia.

Columna E Sembrado

Diahuebs 26 februari. Di Prome Siman den tempo di Cuaresma año 2026 Ciclo A

Calendario Liturgico

Lectura: Ester 4,17 k.l.m.r.s.t.;

Salmo: 138;

Evangelio: Lucas 11, 29-32;

"Pasobra ken cu pidi, lo ricibi, ken cu busca, lo haya ;y ken cu bati porta lo habri p'e" Mateo 7,8

Tin momentonan den bida cu nos ta cana cu necesidadnan scondi of cu preguntanan cu nos no kier vocifera. Tin biaha nos ta tene speransa pa largo tempo na algo cu nos kier ricibi pero tin miedo di papia di dje. Hesus kier invita nos pa habri nos curason na djE. Nos no mester ta perfecto ni e ser di mas fuerte, E djis kier pa nos bin cerca djE manera nos ta. Nos por pidi pasobra Dios ta scucha. Nos por busca pasobra buscando nos ta yega mas cerca di Dios y ora nos bati Señor lo habri e porta corecto y na e tempo tambe corecto. Tin biaha e contesta por yega hopi lihe y otro biaha e por tarda mas di loke nos ta desea pero Señor su promesa ta keda firme: ken cu pidi lo ricibi, ken cu busca lo haya. Tur oracion tin balor y tur peticionnan ta wordo scucha. Laga e versiculo aki ta un recordatorio constantemente cu Dios no ta lubida riba bo.

Oracion: Mi bon Dios siña mi pidi cu fe y confiansa den Bo. Yuda mi busca cu conviccion y speransa di haya loke mi ta buscando. Y cu e curashi pa bati na e porta ora mester. Laga mi keda cu un curason habri pa Bo por guia mi na loke Abo tin prepara pa mi. Amen.

Grupo Centro Pastoral Aruba

DEPORTE INTERNACIONAL

Luka a duda, LeBron a faya y Lakers a perde contra Magic



LOS ANGELES: Diamars Orlando Magic a tuma e ventaha den nan wega contra Los Angeles Lakers faltando 6.7 seconde y coach di Lakers JJ Redick a tuma un timeout pa planea un hugada final pa su ekipo.

E plan a mostra di bay bon pasobra Luka Dončić a haya e bala y tabata basta habri.

Sorprendentemente Dončić a duda y a dicidi di tira e bala pa LeBron James, kende no tabata verwacht e pase.

Asina mes faltando 1 seconde el a haya su mes ta los un tiro, pero e bala a faya e rim y Magic a gana e wega 110-109.

Trempan tur cos tabata indica cu Los

Angeles lo no tin mucho problema pa gana e wega, pero fayando varios tiro Lakers a permiti Orlando pa keda cerca, cu e consecuencia cu nan a perde na final.

Maximo anotador pa Magic tabata Paolo Banchero cu 36 punto, 10 rebounds y 6 asistencia, mientras cu Desmond Bane a contribui cu 22 punto y 6 asistencia.

Maximo anotador pa Lakers tabata Dončić cu 22 punto, 9 rebounds y 15 asistencia, mientras cu James y Deandre Ayton a termina cu 21 punto cada un.

Ayton a logra gara tambe 13 rebounds.

Mericano di 15 año ta sorprende mundo di tennis door di uza forehand drechi y forehand robes den su weganan



MERCA: E siman aki Teodor Davidov di apenas 15 año a logra su prome puntonan di ATP y desde Diaranson e ta e hungador di tennis mas hoben riba e ranking mundial oficial.

E teenager Mericano di descendencia Bulgaro, a logra yega quart final di un torneo chikito na Naples.

Locual ta remarcable den e wega di Davidov ta cu e no ta haci uso di su backhand.

E ta hunga cu ambos brasa, pues ora cu e bala bay na su banda drechi e ta pone e racket den su man drechi y dal e bala cu su forehand y ora cu e bala bay na su banda robes, e ta uza su man robes y ta dal e cu su forehand robes.

E hecho cu e ta hunga cu ambos mas den e mesun wega ta algo remarcable riba e nivel profesional.

Skenes ta cla pa tira mas cu un wega pa Merca den WBC

PITTSBURGH: Pitcher strea di Pittsburgh Pirates Paul Skenes a confirma Diamars cu e ta cla pa tira mas cu un wega pa Merca den e World Baseball Classic (WBC), cu ta bay tuma lugar den luna di Maart.

Si Merca avansa for di nan grupo, Skenes lo tin e oportunidad pa cuminsa dos wega pa su pais.

“Si nos gana y bay mas leu cu nos por lo mi tira atrobe den e torneo”, segun e ganador di premio Cy Young di Liga Nacional a conta Ken Rosenthal di The Athletic.

No a wordo anuncia ainda ki dia Skenes lo tira su prome wega pa Merca.


Diaranson el a tira den un wega di Spring Training pa Pirates, prome cu e tira den un di e weganan di



exhibicion di seleccion di Merca na Arizona otro siman.

Skenes si intencion di tira mas cu un wega den WBC ta bin un dia despues cu ganador di Cy Young di American League Tarik Skubal a anuncia cu e ta bay tira 1 wega so pa e seleccion na WBC.

Gol den di 97 minuut ta manda Atalanta pa proximo rond di Champions League



ITALIA: Diaranson Atalanta tabata sa cu nan tabata tin mester di gan Borussia Dortmund cu un diferencia di gol di por lo menos 2 pa tin chens pa pasa pa proximo rond di Champions League, despues cu e ekipo Aleman a gana e prome wega 2-0.

Atalanta a cuminsa bon door di anota trempan y hopi laat den e wega nan a anota un penalty pa logra un triunfo di 4-1, pa asina elimina Dortmund.

E prome gol di Atalanta a wordo anota pa Gianluca Scamacca den di 5 minuut y den di 45 minuut Davide Zappacosta a anota e 2-0

pa e ekipo Italiano.

Ora cu den di 57 minuut Mafrio Pasalic a anota e 3-0, Dortmund tabata sa cu nan mester a anota pa no keda elimina.

Esey na sosode tambe, pasobra den di 75 minuut Karim Adeyemi a anota e 3-1.

Si e score lo a keda asina, e ekiponan lo mester a hunga extra tempo pa determina ken ta pasa pa proximo rond.

Sinembargo, den di 98 minuut Lazar Samardžić a anota un penalty pa manda e Italianonan pa e proximo rond di Champions League.



Noticianan for di Hulanda

Servicionan di emergencia presente na ministerio di Husticia y Seguridad pa posibel substancia peligroso



HULANDA: Diaranson diferente servicio di emergencia a presenta na ministerio di Husticia y Seguridad, pa un posibel situacion peligroso.

E diferente ekiponan incluyendo di brandweer na dado momento a presenta dilanti e edificio y prome cu nan a drenta nan tabata deliberando cu otro con nan lo atende cu e situacion.

Prensa a duna di conoce cu aparentemente tabata tin un puero blanco haya den e lugar, cu posiblemente ta peligroso.

Na dado momento polis a duna di conoce cu brandweer tabata atende cu e caso.

Segun polis tabata tin hende den e edificio ainda, pero no tabata tin motibo pa nan sali.

Amsterdam ta manda usadornan di crack bek pa nan pais di origen



AMSTERDAM: Repatriacion di adictonan ambulante cu of sin problemanan psiquiatrico desde 5 aña pasa a aumenta na Amsterdam.

E asina yama Regenboog Groep y organizacion di bienestar Per Mens aña pasa a manda un total di 532 persona, di cual parti tabata adictonan di crack, bek pa principalmente paisnan di occidente.

Alcalde Femke Halsema kier haci uso mas frecuente di e medida aki, segun Het Parool.

Uso di crack y e molester y problemanan cu esaki ta causa den Amsterdam den e ultimo añanan ta aumentando.

Siman pasa Halsema a anuncia cu e kier investiga si usadornan stranhero di crack cu ta biba riba caya por wordo manda bek pa nan pais di origen mas frecuentemente.

El a indica cu repatriacion posiblemente mester wordo uza riba gran escala pa baha e molester causa pa e adictonan na crack.

Diferente persona a bira malo den centro di ciudad di Den Haag

Tabata tin holo stinki ta sali for di riool



DEN HAAG: Den centro di ciudad De Passage na Den Haag Diaranson na final di mainta diferente hende a bira malo.

Un total di 9 persona na dado momento a duna di conoce cu nan no ta sinti bon, pero afortunadamente no tabata tin motibo pa nan wordo hiba pa hospital.

Na prome instancia a pensa cu lo por tabata tin un lek di gas, pero despues a resulta cu tabata trata di un holo stinki relaciona cu trabonan cu tabata wordo haci na e

riool.

Un vocero di veiligheidsregio a splica cu no a midi balorenan eleva di gas.

Pesey el a duna di conoce cu no tabata tin un situacion di peligro pa salud di hende.

E personanan cu a sinti malo a wordo examina pa personal di ambulance y no mester a bay hospital.

Diferente tienda a wordo evacua pa un rato.

Polis di Friesland a desmantela tercer laboratorio di droga den 5 dia



FRIESLAND: Polis di Friesland un biaha mas a desmantela un laboratorio di droga, e biaha aki den Oudehaske entre Joure y Heerenvveen.

Ta e tercer laboratorio cu den corto tempo polis di Friesland a topa cune den un area di naturalesa.

Na Oudehaske dos sospechoso a wordo deteni.

Polis Diamars a drenta den accion

despues cu informacion a drenta cu riba e tereno den Joustergweg na Oudhaskem droga sintetico tabata wordo produci.

Na final di atardi polis a haci entrada y a encontra e laboratorio den un deposito.

E dos personanan cu a wordo deteni pa polis tabata un homber di 69 aña y un otro di 42 aña, ambos di e municipio De Fryske Marren.

Noticia Internacional

Dictadura Cubano a intercepta un embarcacion civil procedente di Merca y a mata cuater miembro di tripulacion

Por lo menos cuater persona a fayece y seis a resulta herida ora cu un speedboat registra na Florida a wordo intercepta pa Guardia di Frontera Cubano un miya nautico for di Cayo Falcones, den e provincia di Villa Clara. E incidente, confirma pa Ministerio di Interior di e regimen (Minint), a sosode diaran-son mainta ora cu e barco a wordo detecta den awanan teritorial Cubano y a ordena pa para.

Segun e relato oficial di e regimen comunista, e boto di patruya Cubano, cu un tripulacion di cinco persona, a acerca e speedboat pa identifik'e. Na e momento ey, e ocupantenan a habri candela riba e forsan an Cubano, loke a provoca un reaccion inmediato. A consecuencia di e intercambio e comandante di e barco Cubano a resulta herida. Despues di e tiroteo, cuater di e tripulante-



nan di e boto a muri y seis mas a resulta herida; tur e heridonan a wordo evacua y a haya atencion medico. Autoridadnan no a divulga e identidadnan of posibel motibonan di esnan envolvi den e incidente di speedboat, identifica pa e number di registro FL7726SH. E poder ehecutivo di e dictadura a ripiti su determinacion pa proteha awanan teritorial, enfatisando cu defensa nacional ta un pilar esencial pa estabilidad regional.

E confrontacion ta sosode den un contexto di maximo tension entre Merca

y Cuba, agrava despues di e bloqueo petrolero impone pa e administracion di Donald Trump despues di e captura di Nicolás Maduro na comienso di januari. E medida aki, cu a limita severamente e acceso di e isla na combustibel, a wordo parcialmente alivia despues di presion di lidernan Caribense, permitiendo e entrada di petroleo Venezolano pa metanan comercial y humanitario.

Incidentenan di e tipo aki tabata frecuente den e ultimo añanan. Na 2022, dos caso similar a wordo registra: un cerca di Villa Clara, caminda un speedboat Mericano a tira riba forsan an Cubano, y un otro na Bahía Honda, cu a resulta den e hundimento di un barco y e morto di varios miembro di tripulacion despues di a dal den un boto di patruya di Ministerio di Interior di Cuba (Minint). Autoridadnan di e regimen Cubano frecuentemente ta informa di a haya speedboatnan bandoma of confisca na e costa norte, comunmente uza pa traficacion di hende y violacionnan teritorial.

Te awor, e Departamento di Estado di Merca no a duna comentario riba e incidente. E contexto actual ta refleha un escalacion di actividad den e estrecho di Florida, un area di riesgo halto caminda interesnan di inmigracion, politico y seguridad ta convergi.

Prome minister Australiano a wordo evacua for di su residencia despues di un menasa di bom

Prome Minister di Australia, Anthony Albanese, a bisa diaran son cu e no tabata tuma su seguridad pa nada despues di a wordo evacua for di su residencia pa varios ora despues di un menasa di bom manda pa un grupo di baile Chines. Albanese a wordo evacua for di su residencia na Canberra diamars atardi despues di e menasa, y a bolbe algun ora despues despues cu nada sospechoso a wordo haya.

Polis a bisa cu no tin riesgo.

“Un buskeda profundo a wordo conduci na un facilidad di proteccion y no a haya nada sospechoso,” nan a bisa, agregando cu “no tin menasa actual pa



comunidad of seguridad publico.”

E menasa di bom tabata entre varios email menasante contra Albanese, manda pa un representante di Shen Yun, un compania di baile clasico Chines prohibi na China cu ta programa pa presenta na Australia e luna aki, un vocero di e grupo a bisa den un comunicado.

NOTICIA FOR DI COLOMBIA

TARIFA DI 30% RIBA 73 PRODUCTO DI ECUADOR

IPIALES: Colombia a oficializa via un decreto, cu nan ta impone un tarifa di 30% riba productonan di Ecuador.



Nan lo ta valido pa total di 73 producto cu ta importa di e pais Ecuatoriano. Pero adem as di esey, a bin cu restriccion cu ta prohibi entrada di varios mercancancia via fronteranan cerca di Ipiales y tambe Puerto Asis. E tarifanan aki imponi door di Colombia, ta bin como contesta pa e decision di Gobierno di Daniel Noboa di Ecuador, cu a introduci un tarifa igual pa productonan Colombiano, cu e excusa cu tin "falta di cooperacion na e fronteranan" pa e lucha contra narcotrafico y gangnan criminal. Na Bogota ta mira cu e decision di Ecuador a genera un "tension internacional grave" y un desbalance den e condicionnan di comercio bilateral. Colombia a calcula cu e tarifanan imponi door di Quito lo por ocasiona un caida di hasta 97% di exportacion pa e pais ey, cu ta un perdida di casi 1.8 miyon Dollar, adem as di un fuerte impacto den regionnan manera Valle del Cauca, Antioquia, Bogota, Bolivar, y Cundinamarca. E tarifa Colombiano nobo ta aplica riba productonan manera arroz, bacoba chikito, banana, awacati Hass, batata, ciboyo, tomati, bonchi, maracuya, coco, y seafood manera trucha y cabaron.

CADA 36 ORA TA HORTA OF DAÑA LUZ DI TRAFICO

CALI: Autoridadnan na ciudad di Cali a entrega un relato preocupante di e red di Luz di Trafico, unda cu adem as



cu Gobierno a stop di drecha Luznan na varios sector, a elabora riba e tema di vandalismo y ladroncia den e prome simannan di 2026. E rapport ta indica cu den e 55 prome dianan di 2026, a constata vandalismo na 38 Luz di Trafico na Cali. Pues cada 36 ora nan ta wordo daña of horta completamente na cruzadanan. "E hortamento y vandalismo ta afecta henter e sistema di trafico y siguridad riba camindanan y ta pone cu tempo pa pasa den trafico ta bira mas poco poco. E rapport a muestra tambe cu den henter 2025 tabatin mas di 200 hortamento di Luznan di Trafico, y loke ta dura hopi ta cu e Luznan aki ta wordo importa, pues no por drecha of reemplaza nan asina rapido. Na Cali tin 517 cruzada cu Luznan di Trafico, y e vandalismo di 200 di nan, ta trece dolor di cabez no djis pa autoridad, sino pa e automobilistanan. Fuera di horta e luznan, nan sa horta waya, y tambe e board electronico di control.

BUS GRANDI A BOLTER LAGANDO 3 MORTO

TUNJA: Un bus grandi di compania Copetrán moviendo riba e ruta di Bogota pa Cucuta, a bolter den area di



municipio San José de Pare na departamento di Boyacá. Tres persona a muri den e accident aki cu a socede marduga, y 18 persona a keda herida. Autoridad a splica cu entre esnan herida tin cinco stranhero, esta 3 Venezolano y 2 Frances. Mayoria di e heridonan a wordo transporta pa Hospital na Monquirá. No tabata necesario pa traslada heridonan pa ciudad di Tunja.

Noticia Internacional

INTERNACIONAL

NOTICIA FOR DI VENEZUELA

YEGADA DI AVION CU 134 VENEZOLANO DEPORTA

MAIQUETIA: E di 115 vuelo di avion cu a saca Venezolanonan for di Merca, a yega na Aeropuerto di Miami e siman aki. E biaha aki e vuelo a bin for di Miami, cu 134 Venezolano abordo. Un total di 114 homber y 17 muhe, un hoben y dos mucha chikito, a baha di e avion y aki un team di siguridad di Gobierno Venezolano a ricibi nan cu protocolnan di siguridad. Nan a hasta check esnan cu kizas mester di atencion medico, y tuma nota detaya di cada uno. E rijnan tabata largo pero cada un persona a wordo entrevista y a scucha nan, pa haya sa pakico nan a wordo deporta for di Merca. Na final nan por a wordo hiba pa nan ciudad unda nan ta biba.



VENEZUELA FURIOSO DI LOKE A PASA NA PANAMA

CARACAS: Regimen chavista a core acusa autoridadnan di Panama despues di un incidente cu a socede cu un maleta diplomatico na Aeropuerto Internacional di Tocumen na Panama City. E caso a socede Diamars 24 di Februari, y un reclamo oficial a wordo haci door di e canceller Yván Gil. El a reclama cu e acto di autoridadnan Panameño ta un violacion directo y flagrante di e Convencion di Vienna riba Relacionnan Diplomático di 1961, unda Artículo 27 ta indica claramente cu no por viola un maleta diplomatico, cu no por wordo habri ni confiscar bao di ningun circunstancia. Pasobra e tin consecuencia pa cu proteccion di su ciudadano- y delegacionnan den exterior. Venezuela a demanda pa cumpli cu e normanan di confidencialidad pa avanza den e agenda bilateral. Venezuela ta existi garantia pa casonan asina no ripiti y ta insisti pa autoridadnan Panameño pa cumpli estrictamente cu e normanan cu ta na vigor pa actividadnan diplomatico y consular, considerando cu ambos pais a expresa nan deseo pa habri Consuladonan bek.



CANAL VTV A ELIMINA BOS DI CHAVEZ DEN HIMNO

CARACAS: Hendenan a cumenza reclama con e canal Venezolana de Television (VTV) ta transmitiendo su Himno Nacional na diferente horario na otro estilo. A sali na cla cu ora nan pasa e Himno marduga pa 12:00 am y tambe mainta pa 8:00 am, ta mantene e version tradicional cu bos y imagennan di Hugo Chavez den e video, mientras cu ora cu pasa e Himno merdia, por mira algo diferente. Eynan ta mira e Himno Nacional cu video di Sistema Nacional di Orquesta y Coronan Hubenil y Infantil di Venezuela, y presentacionnan grandi, incluyendo mucha y hobennan tocando fiyo y cello, y tambe monumentonan historico, y e zwaaimento di e bandera. Tambe por mira futbolistanan Venezolano cantando Himno, y cara di diferente ciudadano ta canta cu orguyo. A sali na cla cu desde 4 di Januari, VTV a cumenza pasa e Himno asina den ora di merdia. Esey ta indica cu pa hopi hende, VTV ta tratando di "paga" e presencia di e ex-lider Chavista.



Turismo Colombiano na Republica Dominicana ta crece cu 19% y ta lidera e recuperacion di Caribe na 2025



Un aumento di 19% den yegada di turista Colombiano na Republica Dominicana na 2025 a marca un logro pa e sector di turismo di Caribe. E aumento aki a hiba e total na 400.936 bishitante, solidificando e posicion di Colombia como un di e mercadonan di fuente principal di Sur America y reforzando e liderazgo di Republica Dominicana den e region. E cifra aki ta bira mas significativo ainda mirando cu e afluencia di biaheronan Colombiano a triplica e nivelnan pre-pandemia, ora cu e pais a ricibi mas o menos 100.000 bishitante for di Colombia.

E informacion, presenta durante e Showcase di Turismo Anato 2026 na Bogotá, ta demostra cu e demanda Colombiano ta sigui subi y a bira un di e impulsornan clave di e recuperacion turistico di Republica Dominicana. Segun e Minister di Turismo, David Collado, e salto aki ta debi na un combinacion di factornan: prijsnan competitivo, servicionan di calidad y normanan halto di siguridad, elementonan cu a posiciona Republica Dominicana como un opcion preferi bou di biaheronan Sur Americano. E Vice-Minister di Turismo, Jacqueline Mora, a

señala cu Colombianonan actualmente ta representa 5% di tur turista internacional cu ta yega e pais. Mora a destaca cu Republica Dominicana su ofertanan turistico a adapta bon, brindando turismo di calidad vu ta accesible tanto pa loke ta trata prijs como e diversidad di experencianan. Ademas, e segmento familiar ta significativo: 47% di turistanan Colombiano ta biaha cu nan famia, confirmando e importancia di e demografia aki dentro di e fluho di bishitante, segun Diario Libre. Un di e caracteristicanan mas sobresaliente di e turista Colombiano ta nan preferencia pa actividadnan pafo di nan acomodacion. Segun datonan presenta na Anato, seis di cada dies ta scohe pa disfruta di excursionnan of tournan durante nan estadia, sea pa aventura, naturalesa of cultura local.

Ministerio Publico ta habri investigacion penal na Costa Rica riba filenan di Jeffrey Epstein

E publicacion di documentonan di corte relaciona cu e caso di Jeffrey Epstein a provoca un investigacion penal na Costa Rica riba supuesto abuso sexual di un menor di edad. E investigacion aki a wordo stimula pa e magnitud di e scandal internacional y e inclusion di mas cu 250 referencia directo na e pais den e archivonan desclasifica pa e Departamento di Husticia di Merca na januari di e aña aki. E proceso, lidera pa Procurador General Carlo Díaz, ta keda den su fase inicial y ta wordo manteni estrictamente confidencial. Autoridadnan ta pensando pa forma teamnan specialisa pa atende e complejidad di e caso.

Ministerio Publico a aclara cu e investigacion a surgi



for di documentonan nobo relaciona cu e caso di Epstein, cu ta inclui mas di 3 miyon pagina, potret y video. Den e material ey, Costa Rica ta aparece por lo menos 289 biaha. E informacion aki a causa e intervencion di Fiscal Suplente pa Asuntonan di Genero. E dossier di e caso, number 26-000155-0994-PE, ta clasifica como "contra partidonan desconoci," loke ta nifica cu ningun individuo no a wordo identifica formalmente como acusado ainda. Procurador General Carlo

Díaz a duna instruccion na Fiscalía Suplente pa Violencia di Genero pa habri un investigacion riba un supuesto caso di abuso sexual contra un menor di edad. Díaz a bisa Teletica.com cu e investigacion ta considerando inclui oficianan specialisa di Fiscal, manera e Unidad di Traficacion di Hende y e Unidad di Infancia y Adolescencia, como tambe e Oficina di Consejo Tecnico y Relacionnan Internacional (OATRI), dependiendo di e progreso y complejidad di e caso.

Experiencia ta manda
CICLONE
Septic Tank Service
Tel: 564-0607 / 734-0607

TA FURA
ELMA UPHOLSTERY
Matras, box busca mainta y haye atardi! Set di sala, tv chair, sienta auto.
Tel: 565-5577
Macapruimstraat # 1L

CONSTRUCCION REMODELACION
Nos ta traha y drecha tur sorto di dak: shingle, eterniet, panchi, zink. Pega bloki, tegels, plafond, pleister, pone porta, lanta cura, basha vloer, construcccion di cas y apto bon prijs. Free quotation.
Tel: 561-2137

NOS TA CUMPRO
Oro y plata kibra, holoshi antiguos y moderno di bon marca.
SILVER LEAF
Havenstraat 32
Tel: 746-0535 / 592-1776

TA FURA STOEL
CEL: 561-2941

WASMACHINE
Ta drecha wasmachine, dryer, stoof, forno.
Ta drecha, service y instala airco. Tel: 742-2518.
Ta drecha na cas mes.

SEÑORA TA OFRECE
Pa drecha paña, cortina, traha furu pa stoel, sofa y ba haci tur tipo di trabao di cosemento.
Mi mes ta busca y hibe bek pa bo. Tel: 660-7571.

DIRECTV
A miho T.V. na Aruba Mundial Futbol na caminda, haya bo DIRECTV awo prome cu ta caba.
Yama cel: 733-5762

TA CUMPRO
Holoshi antiguo y moderno di bon marca.
Tel: 744-9995

TA CHAPI
Corta mata.
Ta tira sushi afo. Nos ta hardineria completo na super bon prijs.
Tel: 569-8003

DIARIO
Pa noticia, cumpleaños, comentario, redaccion: noticia@diario.aw
Tel: 582-6747

Team Snor lo enfrenta Team Sero Blanco



ORANJESTAD (AAN): Diasabra awo, 28 di februari, net riba e ultimo dia de

februari, Team Snor lo enfrenta nan eterno rival, esta Team Sero Blanco, cuminsando desde 8'or di anochi. E anochi aki lo mester wordo "vastgeprikt" riba kalender como otro sambombaso den domino! No ta di awo, pero di basta

tempo caba e ekipo procedente di "White Mountain" tin un "appeltje te schillen" cu e team cu a bolbe habri temporada nobo biento en popa! E mundialmente famoso Domino Square Garden, situa net n'e grens entre Calabas y Kudawe-

cha, lo bay ta chikito p'e avalancha di fanatico di ambos ekipo cu lo bin apoya nan team y, mas cu claro, probecha dje snacks por nada cu ta skeiro rond full halftime! Manera di custumber, entrada lo ta completamente gratis pa pueblo en general y e pasapalonan lo ta "reketekete" totalmente por nada. E aña aki Snor a bolbe habri temporada cu bon pia, y mas cu logico e ta cargando e bijnaam "Da Team to Beat". Varios team lo no ta di acuerdo, of hisa schouder y bisa "tcht!", pero un cos mester admiti si cu Team Snor, bou liderasgo dje flamante stratega Nelson "Snor" Perez acompaña pa su temibel side kick kende ta famoso pa salbar e team den oranan sumamente preta, awe en dia ta un dje ekiponan cu mas duro pa surpasa. Mas cu claro, Sero Blanco lo tin gana pa nan t'e team cu lo pone Snor dobla bigote warda! Pues shonnan, diasabra awor 28 di februari, cuminsando pa 8'or aya ne palacio di domino na Kudawecha, e grandioso encuentro entre Team Snor contra Sero Blanco DT!

Ta busca
un ayudante di cas domestico (interno) cu por haci tur trabou di cas incluso cushina. Pa mas informacion yama +297 592-6448 entre 9'or di mainta y 9'or di anochi.

ASSOCIATED REALTORS
TABENDE
Un cas espacioso di 5 camber y 2 baño na Huronstraat/ San Nicolas, fixer upper, construi 285 m², tereno 486 m² y pa Afl.420.000,00.
Yama Mito na 593-6318

NOS TIN SERVICIO
Corta mata y palmanan grandi y chikito y peligroso. Hasi tur sorto forma di mata.
Cel: 592-1277

MI TA BUSCA
Un compaÑante pa dokter den exterior. Ta cubri tur gasto, hende serio.
Tel: 562-8630

SUSHI
Nos ta piki sushi tur caminda, lage limpi limpi mane un soño. Pa solamente 50,- pa buelta y Ecotech apart.
Yama nos na 592-5766 of 561-5179. Arubiano trahado.

Trahador di limpieza sospecha di viola muher cu lesion di cerebro den un cas di cuido




VENLO: Den e compleho di vivienda De Witte Steen na Venlo, un trahador di limpieza ta wordo acusa di violencia sexual contra un muher cu ta totalmente dependiente di ayudo, di 35 aña. E lugar ta un cas di cuido unda cu 60 persona ta biba, cu tin un lesion cerebral. Tin di e personanan ta biba den un cas pa un persona, pero otronan ta biba den grupo.

Twanniue J. di Venlo di 50 aña Diaranson a presenta dilanti di hues y ta nenga cu el a comete e acto criminal. Sinembargo Ministerio Publico a exige un castigo di prison di 4 aña contra e homber, cu tratamiento tbs. Segun OM e homber a haci su mes culpable di acoso sexual riba 17 di October y 28 di December di 2024 y violacion sexual riba 3 di Maart di 2025. OM a mostra riba e hecho cu e homber a horta yabi y drenta camber di e muher, unda cu el a kita e pam-

pers di incontinenca di e muher y a viole. E homber a bisti e pampers bek cerca e muhe, pero enfermeronan a descubri rastronan di sanger riba e parti atras di e muhe, na su vagina y riba e clechi di cama. A hasi testnan riba sperma haya riba e cama y via e DNA nan a yega na e sospechoso. Ora cu a puntre di esaki, e homber a splica cu el a 'hunga' cu su mes. A wordo constata cu e homber tin limitacionnan mental leve.

Parlamentario Carlos Bermudez di AVP

Satisfecho cu gobierno ta duna oido na voz di pueblo pa proteha acceso liber na beachnan



ORANJESTAD (AAN): Durante e di dos dia di tratamiento di e Presupuesto Supletorio 2025, Parlamentario Carlos Bermudez, na nomber di fraccion AVP, a entrega un mocion formal den Parlamento caminda ta pidi gobierno pa ahusta of presenta un beach policy nobo cu ta garantiza y salvaguardia e derecho di localnan y turistanan pa haci uzo liber di nos beachnan.

Segun Bermudez, e acceso liber na beach ta un principio fundamental pa Aruba como destino turistico y como comunidad. “Nos beachnan ta parti di nos patrimonio natural y cultural. E derecho pa acceso liber no por wordo limita of restringi pa interesnan particular,” el a declarar.

Den e mocion, fraccion AVP ta solicita gobierno pa inicia implementacion di e beach policy, sea e version ahusta of un politica nobo, no mas tarda cu comienzo di 2026. E meta ta pa tin plan cla pa ehecuta cu ta preveni situacionnan di exclusion y confusion riba beachnan publico.

Bermudez a indica cu el a tuma nota cu satisfaccion di e anuncio reciente di Minister di Turismo, Wendrick Cicilia, y Minister di Infraestructura, Rene Herde, cu pronto lo tin un ahustacion di e beach policy existente. “Esaki ta muestra cu ora Parlamento entrega un mocion cu base riba preocupacion legitimo di pueblo, Gobierno ta honra e mocion y ta tuma accion. Asina e sistema mester traha,” Bermudez a enfatisa.

El a agrega cu AVP ta insistí riba un politica cu ta cla, transparente y aplicabel, pa

evita situacionnan manera ta observa na otro paisnan den region. “Nos no kier y nos no lo acepta nunca un escenario caminda pueblo mester mendiga pa subi riba un beach, caminda acceso ta prohibi of caminda mester paga simplemente pa disfruta di lama. Esaki no ta y nunca lo ta e modelo pa Aruba.”

Fraccion AVP ta reafirma su compromiso pa sigui monitor e proceso di revision y implementacion di e beach policy, cu meta pa proteha acceso liber, mantene equilibrio entre desaroyo turistico y interes di comunidad, y salvaguardia nos beachnan pa generacionnan presente y futuro.



Cumana # 76 & # 44
van Speykstraat # 1
Oranjestad, Aruba
T.: (297) 588-6699
E.: info@aurorafuneralaruba.com

“Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa”.
Salmo: 23

Nos ta anuncia fayecimento di:

Luciana Dossous

Cariñosamente yama: “Lucy”

***04-06-1961 - †19-02-2026**



Na nomber di su:

Rumannan:

Micheline Dossous y famia na USA
Ramou Dossous y famia na Francia
Gizelle Dossous y famia na Canada
Tangui Dossous y famia na Haiti

Prima:

Margarita y famia na USA
Math y famia na USA
Demas primo y primanan

Amiganan stima:

Larissa Erase y famia
Isabel Williams-Lemonier y famia
Imacula y famia
Natasha y famia

Amigo stima manera yiu:

Mark Stephens y famia

Demas famia na USA, Francia, Haiti, Florida, Canada y Aruba

Su ex-coleganan di Renaissance Hotel/ Wind Creek

Nos como famia ta gradici su querido Pastoor Gilbert y Sister Stella Martes, Liderazgo y tur rumannan di Iglesia Emmanuel cu a para cu nos den e momentonan dificil. Tambe un danki special ta bay na Anciano Patricio y Susan Vrolijk, Ruman Luigi y Jaimy Bergen pa nan cuido na cas.

Oportunidad pa condolencia lo ta diabierna 27 di februari 2026 na Aurora Funeral Home di 7:00 pa 9:00 pm.

Alavez nos ta invita tur famia, amistadnan, rumannan di Iglesia Emmanuel, bisiaña-, conocirnan y su ex-coleganan pa e acto di entierro cu lo tuma lugar diasabra 28 di februari 2026 na Iglesia Emmanuel, Grenadaweg # 12-C, Tarabana di 2:00 pa 4:00 pm, despues lo sali pa Santana central na Sabana Basora.

“Mi no a muri ta pesey mino a bisa ayo
Mi a djies habri mi halanan y bula bai keiro.
Boso a keda atras
No laga tristesa Domina boso
Keda uni, un cu otro pa mi Alma esey lo ta mi
Algeria
Recorda mi cu Hopi amor”

Ta anuncia fayecimento di:

Suzanna Lopez

**Mihor conoci como “Suzanna”,
“Mama”, “Dudu”**

***24 Januari 1941 - †20 Februari 2026**



Na nomber di su:

Mayornan: †Jacobo Lopez y †Reineta Lopez-Maduro

Casa: †Milaan Cornes

Yiunan: Victorine (Irma) y Roland Esser-Cornes

Carmen (Rita) y Edwin Rozenberg -Cornes

Pedro (Eric) y Jacqueline Cornes-Obispo

Norma (Mechi) y †Ramon v/d Berg-Cornes

Theresita (Sita) y Edson Hansen-Cornes

Reynaldo (Naldo) y Dianra Cornes-Bernabela

Nieto/a nan: Elton y Elena Esser-Riaño

Susanrose Esser

Maurits Esser y Judith Maduro

Jeane-Betsy y Arthur Irausquin-Mackintosh

Arisleyda Rozenberg

Marousha Rozenberg

Kaithlyn Rozenberg

Liesbeth Cornes

Bryan Cornes

Alexander y Boyoura v/d Berg-Martijn

Charis v/d Berg y Jermaine Wells

Richinell Cornes y Zinaida Germain

Otmar y Keyla Cornes-Maduro

†Richailly Stacie

Daymiron Cornes y Lisa Schuurs

Rosilaine Cornes

Bisnieto/a nan: Vaylleth Esser-Riaño

Katja Esser

Sue-Diany Vinal

Sergion Esser

Amy Esser

Ken Esser

Nigen Servani y Denelly Franken

Jerishawn Irausquin y Yohendra Kock

Xedella Irausquin

Rayenne Servani y Joël Delgado

Rayveline Servani

Zoë Eskens

Alexia v/d Berg

Daishon v/d Berg

Alexandra v/d Fama

Zaylee v/d Berg

Alexander v/d Berg

Sjoudrey de Cuba -Martijn

Dashron Cornes

Rochell Cornes

Isabell Cornes

Everon Cornes

Zackery Martijn

Mischa-Rella Cornes

Shiloh-Rose Cornes

Tataranieta/o: Jaël Delgado

Raynelienne Servani

Rumanan: Feliciano Lopez y Fama

†Jacobo Lopez y Fama

Armando Lopez y Fama

†Daniel Lopez y Fama

Roberto Lopez y Fama

Augustin Lopez

Angela Lopez y Fama

†Casildo Lopez y Fama

Tantanen: Juana Maduro y Fama

Clara Fingal y Fama

Manera yiunan:

Delia Willems

Lucia Winklaar

Reynaldo Kock I juinan

Raul Lopez y Fama

Gregory Nava y Fama

Carlos Perez

Martha Melaan

Amiganan stima manera ruman y bon bisiañan: Cecilia Willems

Lilian y Juan Maduro

Antonia Perez

Carmen Tromp

Evona Brown

Francisca Maduro

Emily Felida

Bon Amigo nan: Danilo Vrolijk

Vincent Canword

Su Ihanan, Swa, Cuñanan, Subrina, Subrinonan, Primo y Primanan,

Bisñanan, Amiga y Amigonan y demas Fama na Aruba, Hulanda, Curaçao,

Boneiro.

Demas Fama: Lopez, Maduro, Cornes, Esser, Rozenberg, Obispo, v/d Berg, Hansen,

Bernabela, Irausquin, Mackintosh, Riaño, Maduro, Wells, Kock, Martijn, Geerman,

Vingal, Servani, Eskens, Franken, Delgado, de Windt, Vrolijk, Trinidad, De Kort,

Thijssen, Canword, Rafini, Ras, Winklaar, Melaan, Croes, Yarzagaray, Dorothal, Nava,

Loefstop, Stamper, Heyden, Delaney, Windster, Pieters, Bislick, Wernet, Koolman.Y

demas famia.

Oportunidad pa Condolencia lo ta Diahuebs, 26 di Februari 2026 na Ad Patres

Funeral Home & Crematory na San Nicolas di 7'or pa 9'or di anochi.

Acto di entierro ta tuma lugar Diabierna, 27 di Februari 2026 na Misa St. Teresita

na San Nicolas di 2'or pa 4'or di atardi. Despues lo sali pa santana Catholico na

Zeewijk.

Staff y personal di Ad Patres funeral home & crematorium San Nicolas ta extende nos mas

sincero condolencia na Fama di e fayecida.



AD PATRES
funeral home

Van Rensselaerstraat 2
584-2299 / 737-2299
adpatres@qualityservice.com
Family owned and operated



HOPPERS

PREMIERE ON SATURDAY, FEBRUARY 28 & SUNDAY, MARCH 1ST, ONLY AT GLORIA.

SCREAM 7

ALSO IN IMAX

TWENTY-ONE PILOTS CONCERT

IN IMAX ONLY ON FEBRUARY 26 & 28

EPIC: ELVIS PRESLEY IN CONCERT

IN IMAX FOR ONE WEEK, ONLY UNTIL MARCH 4

UFC FIGHT

ON SATURDAY, FEBRUARY 28 AT 6:00PM. DOORS OPEN AT 5:30PM

Desiree Correa a duna un presentacion di Poppenkast na Biblioteca



ORANJESTAD (AAN): Dialuna atardi autora sra. Desiree Correa a duna un presentacion di Poppenkast na biblioteca pa un grupo di mucha y nan mayor. Un presentacion hopi anima y alegre cu interaccion entusiasmo di e publico presente. Siman pasa, autor Desiree Correa,

a presenta su obra literario 'Toi-toi-toi' na Biblioteca Nacional Aruba.

E buki 'Toi-toi-toi' ta contene diferente obra di teatro cortico na Papiamento. Obran di Teatro skirbi pa Desiree y tambe obran di teatro traduci y adapta pa Desiree Correa.

Den e obra aki, Desiree ta presenta 20 obra teatral. Obran di cual mayoria ela presenta na Cas di Cultura. Pa chikito tin obran pa Poppenkast. Titulo di e buki 'Toi Toi Toi' ta referi na un saludo cu cada actor ta bisa otro pa dun'e suerte cu su presentacion riba stage.

Toi - toi - toi




Den e obra aki, mi ta presenta 20 obra teatral. Obran di cual mayoria mi a presenta na Cas di Cultura. Varios ta obran original, algun traduci y algun adapta.

Pa chikito tin obran pa 'poppenkast', esta teatro Harlekin. Ken no conoce e storianan di, entre otro: Assepoester, De kleren van de Keizer, Repelsteeltje etc? Pero awo na Papiamento y den ambiente local.

E titulo di e buki ta Toi Toi Toi. Esaki ta un saludo cu cada actor ta bisa otro pa dun'e suerte cu su presentacion riba stage. Na Ingles nos ta bisa tambe "break a leg."

Desiree Correa



DESIREE CORREA TA PRESENTA OBRAN TEATRAL

**VALUE
YOU'LL
LOVE!**

ONLY AT AMC UNICON!

**GREAT
DEALS**

& HUGE SAVINGS!

SHOP TODAY & GET
UP TO 2 FREE
INSTALLMENTS!
PLUS FREE DELIVERY
FOR CREDIT CUSTOMERS!

Promotion Ends February 28th, 2026.

Conditions Apply.




43" 4K NOW
AWG499
TCL QLED ANDROID
GOOGLE TV 43S5KA



SAVE AWG201
55" 4K NOW
AWG1099
SAMSUNG
UHD SMART TV
UN55U8000FPXPA



Save AWG601
65" 4K NOW
AWG1399
TCL QLED ANDROID
GOOGLE TV 65C755A



Save AWG1101
75" 4K NOW
AWG1599
LG UHD SMART TV
75NANO77SRA



Save AWG151
JBL
PARTY BOX ENCORE
W/2 WIRELESS MICS. NOW
AWG649



569-2407
AMC EAGLE
MEGASTORE

568-9070
AMC
SAN NICOLAAS

HORARIO: 9AM - 6PM
DIALUNA PA DIASABRA



Prome Minister Eman a ricibi bishita di Jalken Antonia di Stichting JA IK ARUBA



ORANJESTAD (AAN):
Diaranson mainta na
Bestuurskantoor, Prome
Minister Mike Eman a
ricibi señor Jalken An-
tonia pa continua comb-
ersacion, tras un prome
encuentro cu a tuma lugu
anteriormente. Señor An-
tonia ta consultor den
change management y
fundador di Stichting JA



IK ARUBA, un iniciativa
enfoca riba guia di hoben
y hoben adulto (13-36
año) den nan desaroyo
personal y profesional.
Durante e combersacion,
el a presenta su trabou
den acompañamento di
organisacionnan pa me-
hora rendimiento, pro-
ductividad, efectividad y
eficiencia. Un di e punto-

nan central di su presen-
tacion tabata e uso di un
instrumento online val-
ida, cu ta ofrece insight
den e fortaleza natural di
un persona y tambe den
comportamento cu por
surgi bou presion. Segun
el a splica, e metodologia
aki por aplica tanto den
desaroyo di ekipo como
individual, y tambe den



studiekeuze, orientacion
profesional y job match-
ing basa riba talento y
actitud. Den e encuentro,
a intercambia idea riba
con e enfoke aki por con-
tribui na fortalecimiento
di organisacionnan den
sector publico y con e
programa di Stichting JA
IK ARUBA por alinea cu
meta nan amplio di desa-

royo humano y eficien-
cia institucional. Prome
Minister a aprecia e ini-
ciativa y e enfoke dirigi
na inversion den capital
humano, reconociendo e
importancia di acompa-
ñamento profesional pa
logra un sector publico
mas eficiente y un hoben
generacion mas prepara
pa futuro.